

ARMED FORCES MEDICAL LIBRARY

Washington, D. C.

**Ein Nützliches vnd
Tröstliches Regiment wi-
der die Pestilenz / vnd giftig Pestilen-
zisch Fieber / die Schweissucht ge-
nant / Vnd sonst mancherley
giftige vnd tödeliche
Kranckheit.**

**Durch Casparum Regeler der Erñnen
Doctorn / weilande zusamnten gebracht /
vnd mit viel tröstlichen Experimenten / Anno
1529. zum Andernmal von jm selber
vernewert vnd gebessert.**

**Nun aber zum Drittenmal durch sei-
nen Son Welchiorent Regeler / beyder
Thumbgestift zu Breslaw Syndicum / mit etlichen
bewerten aus obernanten seines Vatern seligen
hinderlassener Practica / Stücken vnd
Recepten / vermehret vnd in
Druck gegeben.**

Breslaw.

M. D. LXVIII.





EPIGRAMMA
IN LIBELLVM,
DE REMEDIIS CONTRA PE-
STEM, CLARISSIMI VIRI CASPARIS

Kegleri, in celeberrima Lipsensium Academia
olim Medicinæ Doctoris, aui
sui materni: F.

L Ethiferas, cupiens, stygia, vitare sagittas,
Pestis, & horrendæ, noxia tela, luis.
Huc celeri, studeat gressus modò flectere, cursu,
Et vigili, paruum, voluere, mente, librum.
Quem dedit, egregiè, KEGLERVS, in arte medendi
Doctus, & Aonij, gloria magna, chori.
Ignea, nam, postquam regnaret, pestis, in vrbe
Lipsiaca: culti, fama decusq;, soli.
Et multos, raperet, præstanti corpore, ciues,
Qui patriæ, fuerant, nobile stemma, domus.
Tunc tua, Keglerus, voluens monumenta, Galene,
Porrexit fausta, Pharmaca multa, manu.
Pharmaca multa dedit, felici sydere, multis
Ciuibus: unde diu, nomina clara, tulit.
Ac demum, felix moriens, monumenta reliquit,
Ingenij, cunctis, signa futura, sui.
Melchior, hæc igitur, reparans, Keglere, celebrem,
Perpetuæ, laudem, posteritatis, habes.

Caspar Starck Lipsensis.

Den Aichtbarn / Hochge-
larten / Ehrnfesten / Erbaren / Hoch vnd
Wolweisen / Bürgermeistern vnd Rethen
der Churfürstlichen Stadt Leipzig/
Weinen besondern Groszüg-
stigen lieben Herrn vnd
Förderern.

Aichtbare / Hochaclarte /
Ehrenfeste / Erbare / Hoch vnd
Wolweise / groszügige Her-
ren vnd Förderer / Ewer
Aichtbar Hochweisheiten sind
meine vnterthenige jeder zeit gang geflisse-
ne dienst / mit sonderm Trewen beuor.
Groszügige Herrn / Nachdem aus Got-
tes des Allmechtigen verhengnis / nu mehr
hin vnd wider jährlich die erschreckliche vnd
abschewliche Seuche der Pestilentz / herr-
schen vnd vberhandt nemen thut / Deren
doch / vermittelst Göttlicher hülffe vnnnd
Gnade / damit er gepreiset werde in seinen
Wunderthaten / durch seine hohe den Men-
schen

schen verliehene gaben / auch widerstandt
gethan / daruor Praeseruiret / vnd die Inficir=
ten gleicher gestalt / wie die Erfahrung gibt /
daran Curirt vnd zu voriger irer gesunde
können gebracht werden.

Daher dann auch weilandt mein lieber
Vater seliger / Caspar Regeler der Elter /
der Philosophy vnd Artzney Doctor / aus
erheischender Christlicher liebe / seinem Be=
ruff nach / E. Alchtb. Hochw. zu sondern
Ehren so wol menniglichen zu hülff vnd
trost / des verfloffenen 1518. Vnnd dar=
nach widerumb im Tausent Fünff Hun=
dert vnd Neun vnd Zwentzigsten Jare / da
zu Leipzig in meinem lieben Vaterlandt /
vnd vielen örten der Christenheit mehr / an
obermelter Seuche / vnd der Schweissucht /
viel Volcks plögllich vberreilet vnd gestor=
ben / So viel jm der Allmechtige Gott gne=
diglich durch seine vielfeltig ausgestandene
gefahr verliehen / vnd in solcher Not vor
bewert befunden / des mehrer theils / wie das
werck ausweiset / Auch sonderlich wie das
Al iij liebe

Liebe Armut jm selber rhaten köndt / kurtz-
lich im Regiment verfaßt / vnd öffentlich
durch den Druck an tag gegeben / Welcher
wie ich berichte / ob deren wol etliche Lau-
sent gedruckt / doch nu mehr wenig oder gar
nicht zu bekommen: Zu deme / das auch
mit seinem darinn angezogenen wolbewer-
ten Electuario oder Latwerge vom Einhorn
vnd andern / vnbillicher weise / betrieglich
vmbgangen werden solt.

Derwegen aus schuldiger pflicht / lieb
vnd trew / In massen E. Alchtb. Hochw.
vnd meinem geliebten Vaterland ich zu-
gethan vnd verwandt / zu sonderen Ehren
vnd dienstlichem wolgefallen / Auch zu nutz
vnd trost des Niehesten / wie ich denn allhie
im Land Schlesien / von vielen Ansehnli-
chen vnd Ehrlichen Leuten oftmals ermant
vnd gebeten worden bin / diß widerumb in
Druck kommen zu lassen / mich also schul-
dig befinde / dasselbig auch mit wolgedach-
tes meines lieben Vaters in Gott rhuende /
bewerten Experimenten vnd Recepten / so
juuor

Junior darbey nicht gewest/vermehrēt/wel-
che er zum theil aus bewegenden vrsachen
ihme damals Junior behalten / Auch nach-
mals durch erfahrung weiter erlanget / vnd
in sein Argneybuch der Geheimniß oder
Practica verleibet : Wit welchem allent-
ich / sonder Rhum zu melden / durch hülff
des Allmächtigen vergangenēs 1542.
Jars/ auff bitt vnd günstiges Ansuchen et-
nes Erbarn Wolweisen Raths der Keyser-
lichen Stadt Breslaw / wie alda in xxiij.
wochen vber 5900. Personen gestorben/
wolgedachtem Rath meinen günstigen
Herrn / der Bürgerschaft / auch ihres
Spitaler Chyrurgo vnd andern / so es bey
mir gesucht/vmb äimlichs/den Armen aber
ymbsonst zustatten kommen / Dardurch
aus Gottes sonderer gnade vnd hülff / vie-
len ihr leben errettet/ etc.

Dieser gantz tröstlichen zuversicht / E.
Achtb. Hochw. werden solchem allein nach/
dis mein erwerthziges Christliches vorne-
men vnd wolmeinlichen fleis in sonderm
hochgün=

Hochgünstigen willen zum besten vermer-
cken vnd dencklich auffnehmen: In massen
ichs denselbigen vnterthenig entpfolen/
vnd gemeltes meines lieben Vatern seligen
zuuor ausgegangnes / jzgo aber vermehr-
tes Regiment hiermit dediciret haben
wil / etc.

Ganz dienstlichs fleis bittende / E.
Achtb. Hochw. wolten mir dis zu keinem
vorwitz oder vngewürlichem vorhaben deu-
ten / Sondern mich jnen jder zeit zu günsti-
gem willen vnd aller freundlichen beforde-
rung im besten befohlen sein lassen. Welchs
vmb E. Achtb. Hochw. höchstes meines ver-
mügens zuuerdienen / ich stets geflissen vnd
bereit sein wil. Datum Breslaw am 28.
Tage des Monats Nouembris / Nach
Christi vnsers lieben HErrn/Erlösers vnd
Seligmachers geburt/ im 1565. Jar.

E. Achtb. Hochw.

Ganz dienst vnd bereitwilliger

Welchior Regeler/beider
Thumbgestifte aldar
Syndicus/ &c.

Den Alchtbarn vnd Hoch=
gelarten / Ersamen vnd Weisen / Bür=
germeistern vnd Rethen / der Fürstlichen
Stadt Leipzig / Wündsche ich Caspar Re=
geler / der Ergney Doctor / Snad vnd
Fried / in Christo Ihesu vn=
serm Seligmacher /
Almen.

Alchbare vnd Hochgelarte / Er=
same vnd Weise / Groszgünstige liebe
Herren vnd Freunde / Eben die liebe so
ich zu gemeiner Stad Leipzig getragen /
die mich nu bey Vierzig Jaren darin=
nen gehalten / welche mich auch so beherst
gemacht hat / das ich nu Vier Sterben nach einander /
bey euch trewlich gehalten / vnd mein leben vmb ewere
willen dar zusehen / nicht gespart / wiewol ich zum vierd=
ten mal auch in höchster fehrlichkeit des lebens gestanden /
Aber mit der gnaden hülffe Gottes / vnd meiner bewer=
ten Kunst / die ich aus derselbigen erlangt / vnd mit gros=
ser mühe vnd arbeit zusammen getragen / In massen ich
ein grosse anzal der Einwoner / von derselbigen tödlichen
not / also auch mich selbs / darzu mein Weib / Kinder / vnd
Hausgesinde errettet / widerumb zu gesundheit gebracht
hab / gleich dieselbige liebe / bewegt vnd treibt mich jhe
auch / das jenige so ich mir in dem nechst meinem ausge=
gangen Regiment / aus bewegenden vrsachen / vorbe=
halten

halten habe / iſt auch an den tag zugehen / auff das ich dar-
mit ſo viel Leute / als mir möglich / vnd Gott dem HErrn
gefellig were / erretten (vnd demnach ich im alter eben
hoch geſtiegen bin) dieſe tröſtliche Erſney mit mir nicht
erleſchen möchte / Dieweil ich mich aus mancherley anzei-
gung befahre vnd gedüncken laſſe / das vns abermals ein
hefftige Peſtilenz nicht weit von der thür / vnd das die
Schweisſucht (also pflegen ſie die zu nennen) allein ein
Indicium vnd Vorbote derſelbigen / Auch die Luſt allhie
noch nicht inficirt oder vergiftt ſey / Dann wo die Luſt
mit zu vergiftt were / ſo würde dieſe Schweißſucht (die
in meinem vrtail nichts anders iſt / dann ein hüzig Peſti-
lenziſch Feber / ſo ſich inwendig one erangung einiges
Bubon / Carbunkel / Schwarze Blatter oder Peulen-
ſacher) gar viel hefftiger angreifen / vnd viel ſchneller
end geben / derſelbigen auch one merckliche hülff der Erſ-
ney / vnd wir iſt allein durch den Schweiß vnd ſchlechte
Erſney / nicht widerſtanden werden mögen / ſo hab ich
mich vmb E. A. W. vnd gemeiner Stadt willen / hohes
vnd nidere ſtandes / in iſt empfangen erſchrecken / furcht
vnd imagination zu tröſten / Auch nicht allein mit dieſem
Regiment / Sondern auch perſönlich / beyſtand / hülff vnd
rath mit zuteilen vnterwunden / Vnd auch nicht allein in
dieſen beyden angezeigten ſellen der Peſtilenz vnd
Schweißſucht / Sondern auch in viel andern ſellen / gifti-
gen vnd tödtlichen Krankheiten / mancherley Erſney /
vnd Medelen anzuzeigen / welche ich aus viel erfarunge /
weiter ſuchunge / vnd Perſönlich practicirunge bewert /
zuſammen gebracht / vnd mit viel Newen vnd Edelen Ex-
perimenten gebessert. Das ich aber die heimlich / vnd
biſher nicht viel üblichen bewerten Erſnehen / wider alle
Giff / vnd ſonderlich für das Vergeben / das ich vor all-

weg hinhinder gehalten/ nun an den tag zugeben/ willen
habe/ Darzu beweget mich nicht am wenigsten vnser
Chriftlicher vnd Hochlöblicher Landfürst (Dann die
grossen Heupter müssen sich im selbigen fall / am meisten
besorgen) Auff das der vns armen Vnterthanen zu
trost/ glück/ fried/ vnd endlicher Seligkeit / deſter lenger
erhalten/ Vnd wo G. F. G. (daruor in der ewige Gott
behüten wolle) auch mit der andern Seuchen einer ver-
leket/ das man jme/ mit nachfolgenden Medelen/ zu hülff-
fe komen/ oder mit den Präſeruatiuen/ wie andere/ daruor
bewaren möchte.

Solches habe ich E. A. W. als de-
nen ich es / ſampt ganser Gemein / nach hochgedachten
W. G. H. fürnemlich gemeint/ vnd zu troſt vnd gutten/
zuſammen gebracht vnd geoffenbart habe/ zueigenen vnd
aſſcribiren wollen/ Dienſtlich bittend/ E. A. W. wollen
das mit ſolchem gemüt von mir vermercken vnd anneh-
men/ als ich es herzlich vnd wol gemeint habe/ E. A. W.
fürnemlich / vnd darnach gemeiner Chriſtenheit zu gut/
das wir alle in langwiriger geſundheit geſriſtet/ Auff das
wir vnſere Sünde büſſen/ vnſer leben beſſern / vnd dar-
durch mit Göttlicher hülff/ das ewige leben erlangen/
vnd Gott ewiglichen loben möchten. Darzu

helffe vns die Göttliche gnade

vnd Barmherzigkeit/

A M E N.



Die Alte Vorrede.

Es ist augenscheinig vnd am
tage / das die ernsteste Gerechtigkeit
des Allmechtigen ewigen Gottes /
itzunder zu diesen vnsern zeitē / schier
durch die gantze Christenheit (viels
leicht vnser vngehorsams / das ist
vmb vnser Sünde willen / mit entziehunge / oder ab-
wendung seiner Göttlichen gnaden) in mancherley
fehlrigkeit der Seelen vnd des Leibs / als ein Vete-
licher straffer / vnter andern / mit der straffe der Pes-
tilentz viel hefftiger vnd einhelliger / dann zu vor ge-
wönlich / vber vns armen erscheint / Also / das wir
mit der heiligen Kirchen itzund wol mit warheit
singen / Ja billicher wehklagen möchten / das wir
mit halben leben im todt / vnd niemands zu suchen
der vnser helffer / vnd billicher straffer sey / dann
Gott / Derselbige vnser **DEUX** / wiewol sich die
angezeigte Kranckheit der Pestilentz / zu zeiten aus
natürlichem lauff / vñ einfluss des Himels / gebiert
vnd vrsachet / So haben wir doch auch erschreck-
liche ebenbilde in der Heiligen Schrift / an mehr-
ley örten / das Gott der **DEUX** den vngehorsam
seines Volcks / gemeiniglich mit Krieg vnd Pestil-
lentz gestraffet / Wie auch in dem ij. Buch der Kö-
nige am 24. Cap. dem König David vmb seines
vngehorsams willen / ein jemmerlich geteiltes vor-
gelegt / vnd gegeben / Wie er auch den Kindern von
Israel (so sie seine Gebot nicht hielten / vnd die auff
gesetzten Ceremonien / vnd zierlichkeiten des dienstes
Gottes /

Gottes / verachten würden) mit straffe der Pestilenz gedrawet / das hat man Levitici / Numeri / vnd Deuteronomij am 26. 14. vnd 18. Capit. nach der lenge beschrieben.

Derhalben ich Casparus Regeler / der Ertzney Doctor (Dieweil ich aus erweckter Christlicher vnd Brüderlicher liebe / eine leibliche Bewarunge vnd Ertzney wider die Kranckheit / den Reichen von dem / so dannoch vmb zimlich / vnd den Armen vmb wenig / oder one gelt / zubekommen ist / zu beschreiben vorgenommen) mit nichten vnterlassen wollen / die Geistliche der leiblichen Ertzney vor zuziehen / vnd getrewlichen zu rathē / Das wir vor das erste / vnd vor allen dingen darauff achtung geben / das vnser Gewissen / nach warer Reue vnd Busse (so viel Menschlicher blödigkeit möglich) rein gehalten / in einem simpel gehorsamen / vnnd getrewen Glauben gegründet / vnd mit Göttlicher liebe vnd tugenden gezieret werden / darmit hat David / das entblöste Schwerdt des DLRen / widerumb in die scheide gebracht / Darmit mügen wir auch den zorn Gottes (ob der ja so hefftig vber vns entzündet were) widerumb senfftmutigen / vnd darneben wollen wir dester weniger nicht (dieweil Wurzel vnd Kreuter / Edelgestein / sampt andern Aromaten / der gütige Gott / zu auffenthaltung vnserer Natur geschaffen hat) vns der leiblichen Ertzney / nachfolgender weise / Oder wie es ein jeder besser wüste / mit fleis gebrauchen / vnnd nicht vnterwegen lassen,

Die Neue Vorrede.

Dieweil wir aber nu vor Augen sehen/das vns der Allmechtis Gott mit mancherley jammer begint anzugreifen / vnter welchen die zwispaltigkeit / so durch den Erbfeind des Menschlichen geschlechts / vnter vns Christen gehabt/nicht der geringste ist / Darans meines besorgens / der ander jammer des meisten theils erfolget / Vnd wie wir neue Geberde/ neue Flüche/ neue Kleidung vnd neue vnchristliche Glauben an vns nemen/ Ist zu besorgen/das vns Gott der **W E R T** nicht allein diese Neue / vnd in Deuschland vngewöhnliche Kranckheit der Schweisucht/sondern noch mehr erschrecklicher Kranckheiten zu schicken/ vnd darnach mit einer hefftigen Pestilentz/ auff künfftigen Sommer nachfolgen/vnd endtlich die straffe/ wie in Italia geschehen/mit Thewrung vnd Krieg beschliessen werde. Derhalben wil ich einen jeden Christen zu der Geistlichen Ertzney/das ist/ zu der Bussē/vnd besserung des lebens ermant / Darmit haben die Niniviten/ vnd ander viel/ barmhertzigkeit erlangt / Vnd das der Allmechtige Gott / die straffe so er jnen auffgelegt / von jnen gnediglich wider abgewendet hat. Zu solchem helffe vns die Weilige Dreyfaltigkeit/ Gott Vater / Gott Son/ vnd Gott der Weilige Geist/
AMEN.

Zum folget auff Kurtze der Inhalt vnd Beschlus diß Regiments.

DIm Ersten/ Wie sich ein jeglicher Mensch/ wasserley Complexion er ist/ das ganze Jar vber Präseruiren vnd bewaren kan/ das er mit Göttlicher hülff vnd Gnade nicht insicirt werde von einerley Giffte/ Darnach von Monat zu Monat/ von Wochen zu Wochen/ von Tage zu tage. Vnd ob sichs begeben/ das jemand durch vnseumligkeit/ oder per contagionem, das eins vom andern bekümpft/ vnd insicirt würde/ wie man denselbigen zu hülff komen/ erretten/ vnd vermittelst Göttlicher hülff/ widerumb zu voriger Gesundheit verhelffen mag. Auch wenn jemandes vergeben würde/ aussershalb der Pestilenz/ mit wasserley Giffte/ wie man die von ihm bringen sol. Vber dis alles/ wie man die Apostem/ Carbuncel/ vnd schwarze Blattern Curiren/ die Giffte ausziehen vnd tödten sol/ das die nicht zum Herzen möge steigen/ vnd das auffs newe vergiffen vnd insiciren. Wie man sich mit Essen/ Trincken/ vnd in andern Stücken halten sol. Was zu meyden ist/ Wie man Reuchern sol/ vnd womit/ das die giffteige Luft gereyniget werde. Was ein jederman bey sich tragen sol/ vnd daran riechen/ das er nicht leichtlichen insicirt mag werden.

Zum

Im Ersten/ ist not einem jglichen Menschen/ der sicher wil sein vor aller tödtlicher gift der Pestilenz/ vnd Pestilenzischen feber/ als auch ist die Schweis sucht/ das ganze Jar vber/ Das er sich lasse Purgiren Neunt tage vber nach einander/ mit den Pillen vnnnd Puluer von Reubarbaro/ vnd mit zu gebrauche das Electuarium liberantis/ wie folgen wird.

Puluis
de Reu-
barbaro.

Das Puluer macht also von Reubarbaro: Nemet der allerbesten Reubarbari/ ein halb lot/ Dyagridij aus der Apoteccken also genant/ Mastix/ vnd Römische Kirschen mit den rothen Jüdenhüttichen/ zu Latein Alkekengi genant/ die sich pülueren lassen/ jgliches ein halb dragma/ das ist ein halb quinten/ Daraus macht ein Puluer/ welches dienet allen Menschen/ darzu Frauen vnd Kindern.

Pillulæ
von Reu-
barbaro.

Die Pillulen von Reubarbaro macht also: Nemet der besten ausgelesen Reubarbari/ des besten Theriackes/ der nicht zu new noch zu alt ist/ Soluns der Bletter/ Creutzsalben Bletter/ Römisch Kirschen/ der jgliches ein halb lot/ Dyagridij aus der Apoteccken also genant/ Mastix/ Zitwar/ der jgliches ein halb quinten/ Diese Acht stücke macht zu Puluer/ vnd thut darzu geschewmet Honig/ so viel das es werde ein harte dicke Massa wie ein Teig/ in einem Mörser sehr wol vntereinander gestossen/ vnd von jglichen quinten macht xij. Pillen/ die gebraucht man wie folgen wird.

Das Electuarium liberantis, das zu diesem Puluer vnd Pillen gehört/ lasse ich vnuerdeudsch/ Denn es kein Leye machen kan/ auch so viel Species nicht kennen mag/ denn mehr denn xl. stücke darein gehen/ welches die Apoteccker also sollen machen/ wie folget/ vnd nicht anders. Vnnnd heist darumb
Electuas

Electuarium liberantis, das es ein Menschen ist præser-
uiren/ vnd auch erlösen von aller Gifte/ welches man
kan inn viererley weise machen/ Als/ in Zucker Rüche-
lein/ oder in tabulirten Zucker/ in Latwerge/ oder inn
Puluer.

Electuarium liberantis wird
also gemacht.

℞ Rad. tormentil. se. end. citri. corian. præ-
parati. acetosæ. ana. ʒ iiij. omnium sandalorum
ana. ʒ. ij. boli. ar. terræ sigillat. ana. ʒ vj. mar-
garitarum non perforatarum. corall. alb. & rub.
carabæ. rasuræ eboris. spodij. oſis de corde cerui.
ana ʒ ij. Been. alb. & rub. doronici rom. cardamo.
macis ligni aloes. cinamomi, zedoariæ xilocalsiæ
ana. ʒ j. croci orientalis ʒ 5. Smaragdi. hiacin-
thi. granati. ana. ʒ j. serici crudi minuti, incisi &
præparati, ʒ. j. camphoræ. gr. xiiij. ambræ. musci
ana. gr. vj. zuccari candi, zuccari ros. in tabulis,
Manus Christi perlati, penidiarum ana. ʒ ij.
Confer. ros. borragis Nenufar. ana. ʒ iiij. zuccari
tabarzet. q. s. & cum aqua ros. & buglossæ fiat
confectio in rotulis, aut fiat tabulatura, Electua-
rium, vel tragea.

Das Puluer vnd Pillulen von Reu-
barbaro/ auch das Electuarium liberantis, sol man also
nehmen Neun tage nach einander.

Des Puluers von Reubarbaro / gibe

Gebrauch
des pul-
uers.

man einem verwachsen Menschen/ ein halb quinten inn
einem lautern Wein oder Bier/ lauter Erbsuppen/ oder
Fleisch suppen/ warm gemacht/ vnd das Puluer vort
Reubarbaro darinnen wol zutrieben/ vmbgerürt/ vnd
früe zwischen vieren vnd fünffen eingetrunden/ vnd v.
stunde darauff gefasset/ warm gehalten/ darauff eine
stunde geruhet/ Jedoch das man darauff nicht schwitze/
auff das die Wirkung nicht verhindert möcht werden/
vnd also verfolget viij. tage nach einander/ das Puluer
also zu nemen/ wie gelehrt ist/ Ist anstreiben durch den
stuelgang alle giffte/ sie sey in oder auffserhalb den Adern.
Den ix. tag früe zwischen vier vnd fünff/ nemet iij. der
Pillen/ der man xij. von ein quinten macht/ fastet iij.
stunde darauff/ Diese Pillulen bereiten das geblüt/ das
durch das Aderlassen der Basilica am rechten arm/ zu
Deudsch die Leber ader genant/ ausgetrieben wird das
schwarz unrein vnd gifftig ist.

Vrsach /
das man
nicht
schwitzen
sol.

Giffte aus-
treiben
durch
stulgenge.
Gebrauch
der pillen.
Aderlass
en.

Welche aber nicht gerne so offte das
Puluer nützen können / die nemen allein den ersten tag
das Puluer/ wie oben gelchret ist / ein halbes quinten/
Darnach die andern acht tage/ alle morgen iij. der Pils-
len gantz eingeschlungen / drey oder vier stunden dar-
rauff gefasset/ vnd die Leber ader gelassen/ wie gelehrt
ist/ Vnd die ix. tage vber/alle Abend wenn man zu bette
wol gehen / mus man das Latwerge von Liberantis
eines lots schwer einessen/ ein jzlicher in waserley weise es
kan am besten einbringen.

Gebrauch
des Ele-
ctuarij
liberantis.

Das Regiment/ wie man sich die ix. Tage vber halten mus.

Eigema

Einem jeglichen / der diese dreyerley
Ergney brauchen wil / ist von nöten / das er sich
die ix. Tage vber enthalte von vbrigem essen vnd
trincken / sonderlich kein Wein trincke / keine Eyer noch
Schweinfleisch esse / dergleichen sich enthalte von Milchs-
speis / vnd von ehelichen wercken.

Vnd so sich ein Mensch die ix. tage also
helt / wie gelehrt ist / wird mit Göttlicher hülff vnd gna-
de / bewart das ganze Jar vber / vor aller Pestilenz vnd
Pestilenzischen Seber / als auch ist die Schweisucht.

Wach-
sam
für diese
Cura.

Sicherung eines Monat lang vber.

Int Musleuffen safft / das ist der
cusserste grüne schalen ausgedruckter Safft von
Welschen Nüssen ein halb lot / Rautensafft iij.
quinten / Isop safft iij. lot / Hanffkraut safft iij. lot /
mische es vntereinander / vnnnd nim dauon j. halb lot /
thu darzu ein halb quinten gepülvert Mumia / Zuckers
Candi ein halb lot / Rosenzucker ein quinten / dis zu-
treibe mit Rosenwasser mit Eßig vermengen / im Som-
mer : Im Winter in ein trünckle Wein zutrieben / vnd
warm gemacht / vnd des Abends so du wilt schlaffen ge-
hen / eingetruncken / vnnnd gegen Morgen warm zuge-
deckt / vñ ij. stunde darauff geschwigt / das benimpt alle
böse giftige feuchtnis / dauon sich erhebt die Pestilenz /
vnd Pestilenzische Febres / sichert einen Menschen einen
ganzen Monat / Denn neme er den andern / dritten /
vierdten Monat aber diese Ergney / so kan er sich von
Monat zu Monat præseruiren. Vnd diser Tranck also
genügt / ist auch gut denen / die sich vor der Wassersucht
besorgen / also genügt in Wein / vnd darauff geschwigt.

Præserua-
tiff wider
die Wass-
ersucht.

Wo aber die Menschen diese zweyerley
Präseruatiff/ als ein Jar lang/ oder Monat lang/
nicht vberkomen noch haben mögen/ die Purgiren sich
dester öfter/ mit den Pillen Pestilentialcs genant/ der
nehmen sie ein halb quinten/ mehr oder weniger/ das sie
ja auff ein mal dauon ein Purgation stuel ij. oder iij.
mögen vberkomen/ in xiiij. tagen einmal/ vnd als oft
man hart im Leibe wird/ dergleichen/ Dann diese Pillen
purgiren langsam vnd leyse/ vnd stercken die Glieder/
Auch erhalten sie die feuchtnis von vergiffung vnd feu-
lung. Diese Pillen kan Ruffius/ Rases/ vnd Auicenna/
vnd andere viel/ die in manchem Sterben blieben
sind/ nicht vol loben.

Wer aber diese Pillen nicht schlingen kan/ der stosse
die zu Puluer/ vnd nütze das inn einer lautern Erbsup-
pen/ Bier oder Wein/ j. quinten/ j. halb quinten/ mehr
oder weniger/ faste drey stunde darauff. Könnte aber
einer das Puluer vmb bitterkeit willen auch nicht ein-
bringen/ so thue darzu ZuckerCandit/ oder andern weiß-
sen Zucker/ das es lieblicher werde/ das neme er ja auff
wenigste in xiiij. tagen einmal/ das er/ wie gelehrt ist/
von den Pillen ij. oder iij. Purgation stül möge vbers-
komen. Dis Puluer/ wenn es zubereitet wird/ wie fol-
get in der Cura/ dienet vor alle Pestilenz/ wie ich an-
zeygen werde.

Aderlass
ken.

Zum Andern/ die viel Bluts haben/
vnnnd zum Aderlassen gewehnet haben/ die lassen alle
Monat ein wenig/ jzunder die Median/ darnach den
andern Monat die Basilica/ jzunder auff der Rechten/
darnach auff der Lincken seiten/ auff das sich das Ge-
blüte in ihnen nicht entzünde. Die aber zu alt oder zu
jung sind/ vnd schwangere Frawen (die sich anders dar-
zu gewehnet haben) die lassen Köpffe setzen/ damit wer-
den sie im Geblüte auch gereiniget.

Welche

Welche aber der Keins thun/ vor jugend oder alter/
oder der gar Keins gebrauchen können/ die gebrauchen ^{Teglich}
dester embsiger dieser nachfolgender Ergney/ einen tag ^{mit den}
vmb den andern abzuwechseln/ was ein jglicher am bestē ^{Präser-}
nützen vnd gebrauchen kan / Auff das der Mlage vnd ^{uation}
die Natur nicht einerley gewohne/ vnd die mehr in eine ^{abzuwech-}
speise/ denn in eine Ergney/ verwandele. ^{seln.}

Nu folget fürzlichen/ was man die
ganze Woche vber gebrauchen kan
vnd mag / zu einer Bewarung.

Willen Pestilentiales / werden vor=
nemlich vorgezogen/ der nemen die Alten xj. oder
xij. mehr oder weniger / darnach sich ein jeder
selbs prüfen kan/ bewaren einen Menschen tag vnd
nacht/ mit Gottes hülffe.

Sawerampffer vj. oder vij. bletter/
früe nüchtern gessen / dieweil sie grün sind/ vnd vorhin
rein gewaschen/ ist eine bewerte Ergney. So man aber
den Sawerampffer grün nicht behalten noch haben
kan/ mag man die Bletter auff einem ofen (das sie sich
reyben oder stossen lassen) dörren/ vnd darunter mengen
so viel Zuckers/ denn habt ihr ein sehr gut Puluer / des
sollen früe die verwachsenen j. quinten / oder Guldent
schwer/nemen/ vnd die Kinder etwas weniger: Denn es
mags ein jederman gebrauchē/auch schwangere Frawen.

Eychenlaub bletter / abgestreiffte von
Sommerlatten/gedörret/ vnd also gepüluert/ mit Zucker
vermenget/ vnd genützt wie vor gelehrt/ ist sehr gut/ vnd
nicht zuuerloben/ böse feuchtigkeit außzutreiben/ Auch
sehr wol dienen/ denen die zu viel Stüle haben/ das zum
offtermal in dieser Kranckheit sich ereugen thut.

Bethonien bletter / werden inn aller massen also bereit vnd genützt/ dienen vor die Gifft/ vnd Hauptkranchheit/ die denn gemeiniglich mit vnterleufft/ vnd mit giffte vermengete ist.

Bolus Armenus/ ist eine rothe Erde/ (vnd gleiches kauffs in der Apoteccken) die zubereit/ ist inn der Apoteccken zubekomen/ gepüluert/ vnd in einem lautern rein Winterzeit/ früe nüchtern/ so nicht Seber vorhanden/ .j. quinten ganz oder halbs: Oder im Sommer vnd Sebers zeit/ mit Rosen oder Sawerampffer wasser genomen/ ist nicht weniger gut.

Terra sigillata/ ein weis versigelt vnd gestempft Erdreich/ findet man auch in der Apoteccken/ ist der krafft vnd Wirkung auch zugebrauchen wie Bolus Armenus/ aller hitziger böser Gifft widerzustehen.

Tormentil wurzel/ früe nüchtern ein stückle/ oder ein halb quinten gepüluert/ vnd mit Scabiosen oder Sawerampffer wasser eingetruncken/ Ist sehr gut.

Dipchan wurzel/ hat macht kreffteiglichen der Gifft widerzustehen/ wird gebraucht wie die Tormentil wurzel.

Angelica/ Heilig Geist wurzel genant/ wird sehr gelobet/ früe nüchtern ein stückle gessen.

Die Rossibenel/ die man die wilde Bibenel nennet/ stehet gemeiniglich in Wisen/ gepüluert/ vnd ein halb quinten/ Winterzeit in rein/ vnd Sommer zeit mit Sawerampffer wasser genomen/ ist sehr gut/ Vnd nicht die das gemeine Volck vor die Bibenel helt vnd gebraucht.

Bibenel nüchtern gessen/ vnd im munde getragen/ bewart den Menschen für böser giftiger Pestilenz

Pestilentialischer lufft/ voraus in kalten Winterlichen
zeiten/ stercket auch das hertz/ den arthem/ vnd die lunge.

Entian wurzel gepuluert/ j. quintlein
mit ein wenig Ingwer/ vnd gedörreten Rautenbletterit
zusammen gemischet/ vnd in warmen Wein eingetrunk-
cken des morgens nüchtern/ ist eine bewerte vorsorge für
die giftige Pestilenz/ Vnd auch eine hilffe für alle stich
vnd biss von giftigen Thieren geschehen.

Weisterwurtz/ morgens nüchtern zwey
oder drey stücklein mit Salz gessen/ ist ein Präseruatiff
für die giftige Pestilentialische lufft/ stercket auch den
kalten schleimigen hitzigen Magen.

Dergleichen mag man auch gebrauchen
Nottewurzel/ Baldrian wurzel/ Osterlucien wurzel/
Holwurtz/ Alant wurzel/ welche der eine auch gefellet/
möget ihr nützen/ wie oben gelehret/ ein stücklein zu euch
nehmen/ oder Puluer daraus machen/ vnd eintrincken:
Oder das Puluer mit so viel Zuckers vermischen/ vnd
die Alten früe treuge j. quinten oder Galden schwer/
die Jungen etwas minder nehmen.

Rorber ij. oder iij. früe nüchtern ges-
sen/ sind sehr gut.

Wacholterbeer/ der vngefehrlich xv.
früe nüchtern/ vnd darunter Welsche Nüsse/ j. oder
ij. aus einem Weinessig/ wird vor die gift sehr gelobet.

Vermut ein wenig/ oder die körnlein
mit Salz nüchtern gessen/ ist bequeme für arme Leute.
Desgleichen Rauten mit ein wenig Salz/ ist eine gute
Erzney.

Ein Ander warhafftig Präseruatiff.

Nim Nusskern/ Wacholterbeer/vnd Rauten/ jzliches
ij. oder

ij. oder iij. lot/ die stoffe grob vntereinander/ geus Weins
essig darauff/ dis nim früe nüchtern ein halben löffel
vol/ ist der besten Ergney eine/ den Menschen zubewaren
xxiij. stunde.

Ein gut Latwerge für arme leute.

Nemet Wermut Körnlein/ Raute/ Salben Bletter/
weissen Senff/ vnd Welsche nüsse/ vnd stoffe so viel Sey-
gen darunter/ das es werde ein Latwerge/ Dis nütze früe
nüchtern/ als ein Castanien gros/ ist sehr gut darzu.

Ein viertel eines pfundes geschelter Nüskern/ ein
halb lot Weinrauten/ nicht gar ein quintlin Salz/ 1c.
Solche stücke zusammen vermischt/ klein gestossen/ vnd
mit Sawerampffer safft/ so aus den Blettern gedruckt
oder gepresset/ oder mit dem Sirup Ribes eingemacht
als ein Latwerge/ vnd des morgens nüchtern auch als
ein Castanien gros dauon eingenomen/ wird hoch gelobt.

Zween Nüskern/ ij. Seygen ein altes/ Vnd ein jun-
ges halb so viel/ mit ein wenig Salz gessen/ sind sehr gut.

Ein wunderliche Ergney von Petro de Albano/ geoffenbart von einem be- schwornen Geiste/ welchs er in warheit be- funden hat/ das er dem nicht gleich be- funden habe/ zu Präseruiren.

Wenn man die Krancken besuchen wil/ so neme
Verbena. man von Verbena/ oder Berbena zu Latein/ zu Deudsch
Eysenkraut/ ein zweiglein mit dem kraut/ vnd kawe das
also lange/ das man des geschmacks gewar werde/ als
denn schlinge mans ein. Man sol auch den Safft aus-
pressen vom kraut vnd würzel/ vnd dem Krancken ein
halben löffel vol darvon eingeben/ womit mans im kan
einbringen/ so gewirt jm nichts mit Gottes hülffe.

Vor

Vor das Gefinde/ iij. oder iiij. bißten
Brods mit Butter/ früe nüchtern gessen/ ist sehr gut.

Wehr/ den mittel schuß von ewrent
eygen Harn/ früe nüchtern getruncken/ wenn ihr den
abend zuvor Lorber oder Wacholterbeer gessen habt/ der
Gifft widerzustehen/ wird gelobet vor eine gute Erzney.

Noch sicherer vnd gewisser sind/ The-
riack vnd Mithridat/ in der wochen einmal/ Sommers
zeiten in Eßig/ Rosen oder Sawerampffer wasser zus-
trieben/ als ein gemeine Haselnus gros genügt: Vnd im
Winter inn einem trünckle Weins/ ij. stunde vor tage
warm ausgetruncken/ vnd ein halbe oder ganze stunde
darauff geschwitzet/ vnd vj. oder vij. stunde darauff
gefastet.

Ober diese alle/ meines Ratwerges von Electua
Einhorn/ ij. Erbes gros früe nüchtern genügt/ thut rium no
den Menschen xxiiij. stunde beschirmen/ mit GOTTes strum.
hülffe/ Vnd als ij. Hanßkörner gros in die Naselöcher
gestrichen/ mit den fingern die Naselöcher zgedruckt/
lest das Gehirn denselbigen tag nicht vergiftet werden.
Es dienet auch vor das stechen/ Pleures genant/ vor die
Heuptkranchheit/ die mit Gifft vermenget/ als gemein-
lich in der zeit/ vor auch in der Pestilenz sehr gemein ist/
als ein Haselnus gros inn Bethonien wasser genomen/
vnd darauff geschwitzet. Dienet auch vor alle Omacht/
innerhalb vnd außserhalb der Pestilenz: Auch schwang
gern Frauen/ den gemeinlich die omacht mehr zuhangen
denn andern personen/ in größe einer Seygbonen/ wie es
an jm selbst/ oder in Borragen wasser zutriebe/ zu nützen.
Es ist auch eine gewisse Erzney/ den das Apostem auff
gefare ist/ so dis gebraucht wie unten angezeigt vnd un-
terweiset wird/ was man in der not thun sol. Vnd also
haben wir gnugsam vnd oberflüssig angezeigt/ was ihr

alle tage die Wochen vber/ vor gemeine vnd gewisse
Ergney / nützen vnd gebrauchen solt. Wer die edler/
thwerer/ vnd schmachhafftiger haben wil/ der suche die
fürder bey den Doctoren.

Dieses allhie gemeltes meines lieben
Vatern seligen / wol bewertes Electuarium oder Larz
werge vom Einhorn / vnterstehen sich auch etliche ver
messener vnrechter weise nachzumachen / vnd one allen
grund der Warheit / mit bösem gewissen vnter diesem
namen vnd scheint zuuerkauffen / Damit nicht alleine
den Leuten ihr gelt bösslich abrauben / sondern auch zu
befürchten / das sie vmb ihre gesundheit / ja Leib vnd le
ben gebracht / vnd jämmerlich verkürzt werden / Welchs
je durch derselbigen falsches vorgeben / meinem lieben Va
ter seligen (als das er so mit vngewissen Ergneyen vmb
gangen) zu verkleinerung / mir vnd meinen Geschwister
auch zu spot vnd nachtheil gereichen wolt / 2c. Hierumb
ich nicht aus vorwitz / ehrgeizigkeit / oder eygenen nutz
willen / Sondern aus guttem / one rhum zumelden / auff
richtem Gemüthe / trewlich jederman erzelter vnd folgen
der vrsach halben / in solchem bester meinung verwarnt
haben wil. Dann so diese vnbedachtsame Leute vorge
nommen würden / des nicht alleine einen gutten beweisl
ichen Titel oder Ankunfft haben / Ja das auch viel mehr
ist / die Ingredientia nicht alle kennen / viel weniger dar
zu nemen würden.

Vnd sey solchen vermessenen Leuten trotz hiermit ge
botten / das sie den Theriac vnd Michridat / wie sichs
der Description nach erheisset / von deme dann auch in
diesem Anno 2c. 29. zuuor ausgegangenem Regiment /
von der scheidung des Wacholterbeer öls gesagt wird / zu
präpariren / abzusondern / vnd dieselbigen handt griff
der Scheidung wissen solten / welches obermelter mein
lieber Vater seliger / wie ich des wol gewiss / verborgen
gehalten //

gehalten/ Nicht frembde/ sondern seine erwachssene
Kinder mit Väterlichen trewen dis selber vnd in geheim
zu halten/ vnterwiesen: Die wir solchs Electuarium
also/ desgleichen das hierin begriffen Aqua vitæ, Aurum
vitæ, vnd anders mehr/ der waren beschreibung nach/
sonder rhum/ machen vnd zurichten.

Ich wil aber andern Gelerten vnd Erfarnen/ hiermit
ire gute Electuaria oder Medicamina/ mit dem wenigste
nicht veracht/ Sondern nur wider die so vnser Vaters
seligen Namen betrieglich darzu legen/ vnd das darvor
den Leuten einloben/ 2c. von denselbigen wil ich (weil
man einem ding etlicher weise nachahmen/ vnd eine ges
talt/ das es doch nicht ist/ gebē kan) dieses gesetzt haben.

Zu folget / was ein itzli-
cher Mensch (der mit der Pestilenz be-
griffen wird) darfür thun vnd gebrauchen
sol/ durch waserley Zeichen auch bald erkennen
kan/ ob er vergiftt sey/ vnd sind diese.

S O einem Menschen schwer vnd hize vntereinander
ankömpt/ die Beine vnd Arm/ ja auch der
ganze Leib im auffss höchste müde/ vnd das heupt
mit vngewöhnlichem wehe beschwert ist/ die Augen wollen
schlaffsalben nicht offen bleiben/ die Zunge wird dürre/
der lust zum Essen weg genommen/ oder ganz geringe.
Wer solchs oder dergleichen an jm spüret/ der reusper
sich/ vnd wo es in am meisten thut stechen/ es sey hinder
den Ohren/ vnter den Armen/ oder bey den Heißeisen/
da wil haben die gift ein ausbruch/ Dann so das Ge
hirn einem vergiftet/ oder von der Gift angetastet
wird/ treibt es die von sich hinder die Ohren/ das hertz
vnter die arm/ vnd die Leber in gleichem fall zu den Heiße

Zeichen
der Ver
giftung.

Bericht
des Alder-
lassens.

drüsen. Serets nu einem auff hinter den Ohren/ der lasse die Hauptader/welche vber der Mengader ligt/ auff demselbigen arm: Serets aber einem auff vnter den Achseln/ der lasse die Median/auch an demselbigen arm/vnd nicht gegen vber/ als viel vnuerstendige thun/ vnd darmit das Hertz vergifften: Scheust einem ein Apostem auff in den Heidrüsen/ der lasse die Grawenader/ inwendig desselben fusses vnter den Knorren/ vnd allwege ein gute Lose bey einem pfund Bluts/ bis ihm schier gemlich wil werden. Wer das nicht thun kan/ dem ist (vmb der giftigen Bewegung willen/ welche in kleinen Aldern geschicht/ vnd darmit nicht weg/ sondern zu ruck gehet) viel nützer gar nicht zu lassen/ vnd sonderlich auch denen/ so zum Alder lassen zu jung oder alt/ oder auch zum Alder lassen nicht gewehnet sind/ den Balbyrer oder Lasser auch zu rechter zeit nicht können bekommen/ dieselbigen mögen die nachfolgende Erzney nemen/ vnd darauff/ wie folget/ schwitzen/ Es sey auff das Puluer/ Schelwurz vnd Rauten/ Essig/ Zwybel wasser/ Wacholterbeer öl/ mein Latwerg/ oder mein Wasser Aqua vitæ genant/ welches vnter den andern Erzneyen allen die sicherste ist/ als ich inn der Wirkung erfahren/ wie viel ich immer versucht/ gleichwol kein Puluer/Latwerg/ noch anders/ auch das Wacholterbeer öl ihm in der Wirkung gleich befunden/ Derhalben ich mich allwege am meisten darauff verlasssen/ vnd in der not mir selbst/ auch meinem Weibe/ Kindern vnd Gesinde/ auffss wenigste mit vntergemengtet ein wenig/ vnd zu mehr malen (vermittelst Göttlicher hülffe) das Leben damit errettet habe: Diese alle Sechserley Erzney in der not gebraucht/ wie folget.

Die bewe-
resten Erz-
neyen in
der not.

Das Puluer/ für die Armen in der not/ mache also.

Nemet Bybergeil/ Lorbern/ jgliches ein lot/ runde
Holwurtz ein halb lot/Diptan/Enzian/Kroneneuglein/
jgliches

jgliches ein quinten / Kampffer ein scrupel/ das ist ein
drittheil von einem quintlein / vnd wigt xx. Gersten-
Körner schwer/ Diese alle machet zu Puluer/ vnd von
diesem Puluer gebet einem Alten/ dem auffgefaren ist/ Die Erste
j. quinten schwer in iij. oder iiij. löffel vol Saweram Cura.
pffer wasser/ oder Scabiosen/oder Cardobenedicten was-
ser zutrieben/ vnd warm gemacht vnd ausgetruncken/
wol vmbgerürt/ vnd darauff geschwigt iij. oder iiij.
stunde/ ist sehr gut.

Ein ander edel Puluer für alle Pestil-
leng/vnd Pestilengisch Fieber/ es kome
mit frost/ schawer/etc. das macht also.

Nemet der Pillen/ Pestilentiales genant / aus der
Apotecken ij. lot/ die stos zu Puluer/ Broeneuglein/ die
eusserste hant abgeschabet/ vnd mit einer Hornfeilen
Klein gefeilet/ denn sie sich nicht stossen lassen/ j. halb lot/
Einhorn der rechtschaffen vnd frisch ist auch also gefeils-
let/ j. quinten. Die aber Arm sind/ vnd das Einhorn
nicht bekommen mögen/ die nemen an stat des Einhorns/
Hirschhorn/ zwischen zweyen Frawen tagen gefallen/ j.
quinten. Aus diesem allen machet ein subtil Puluer/ Die Ander
des gebet einem alt verwachsenen Menschen eines Gölz Cura.
den schwer/ Bey xij. oder xij. Jaren halb so viel / Bey
vj. oder vij. Jaren aber weniger/ in der dreyerley Wasser
eines zutrieben/ wie oben berürt ist/ Wird vorgezogen
in der Krafft vnd Wirkung/ vor alle andere Puluer/ wie
man die jimmer componiren mag.

Ein anders für arme Leute/ auch sehr
gut/ damit ich vielen geholffen habe.

Nemet eine Zwibel/ vmbschneidet die Blumen zu rings
vmbher/ das man den Kern oder zäpflein mit der Blumen
D iij möge

Die drit-
te Cura.

möge ausziehen / denn hölet die Zwibel aus drey oder vierfach / vnd thut darein anderthalb quinten schwer gutten alten Theriack / Oder nemet des als eine grosse Haselnus / denn stecket das zäpfflein mit der blumen widerumb vor / vnd umbwindet die mit nassem wercke / vnd bratet die in heisser asschen / keret die blume vbersich / auff das der Theriack nicht heraus lauffe / Wenn die nu weich gebraten ist / so schelet die eusserste schale ab / vnd zureibet die in einem Keseneple / als man Saffran pflegt zu reiben / Oder zustoßet die in einem Mörser / denn gießet darauff iij. oder v. löffel vol gutes Eßiges / der wol warm gemacht ist / vnd zutreibet wol damit die Zwibel / mit sampt dem Theriack / als denn ringet es durch ein rein Leinens tüchlein / so wird der Theriack zu einem schwarzen wasser / dis macht warm / vn̄ schwizet darauff iij. oder iiij. stunde / Denn widerferet euch nichts / mit Gottes hülffe.

Wolt ihrs noch besser machen / so zutreibet in diesem Zwibelwasser / mit dem Theriack gemacht meines Latwergs eines Gilden oder halben schwer / nach der weiche vnd zertligkeit der Person / vnn̄d macht das warm / vnd schwizet darauff / Ist aber gewisser vnd sicherer / denn das Zwibelwasser mit dem Theriack allein / Wiewol viel auch darvon sind auffkomen vnd gesund worden.

Welcher aber kan gehalten Scabiosen / Sawerampffer wasser / oder Baldrian / oder Cardobenedicten wasser / vnd zutreibet damit die gebraten Zwibel / mit sampt dem Theriack in iij. oder v. löffel vol vnd warm ausgetruncken / ist aber besser / den̄ mit dem essige. Darumb ist mein rath / das einer bey sich habe auffs wenigste das Zwibelwasser mit dem Theriack vnd Eßig zubereit / oder an stat des Eßiges / der vier Wasser eins / vmb sicherheit willen / ob einem geheling vnd plözlich auffüre / das er dis in vorrath hette / wo es die not bes greiffe /

greiffte/ denn rüret das Wasser mit dem Theriac wol
vmb/ (denn von langem stehen setz sich der Theriac der
zu wasser worden ist/ widerumb zu grunde) vnd machet
es wol warm/ vnd gieffet denn darein das Wasser des Aqua
lebens/ Aqua vitæ genant/ ein halb gläslein/ wie ich die vitæ.
pflege abzuwegen/ vnd von mir zu geben/das ist ein halb
lot/ so endert sich das ganze Wasser auff ein neues/ in
die Natur des wassers des Lebens/ Denn trincket das Die vier
also warm aus vor dem schlaff/ vnd ehe das hertz ver- de Cura
giffet wird/ vnter v. oder vj. stunden/ vnnnd schwizet
darauff wie oben ist gelehret/ Ist die allerberwereste Erztz-
ney/ als erfinden mag werde von allen Philosophen vnd
Erzten. Denn in dieser krankheit darff ein Mensch
ein Erztzney von schneller vnd behender wirkunge vnd
durchdringunge aller gliedmassen/ welches alles thut die
Aqua vitæ/ vnd bald einnimpt das hertze des Menschen/
vnd das gewaltiglich vor aller tödtlicher giffte der Pestis-
lantz beschirmet/ vnd beschützet vor allen tödtlichen gifftri-
gen stichen/ vnd also die giffte von sich treibet im schweis
in iij. oder iiij. stunden/ darinne auch ein Mensch nicht
schlafen sol/ Vnd ob jm der schlaff wolte sehr anhangē/
so sol man die Naselöcher mit guttem Eysige bestreichen/
sich auch bey leibe nicht entblößen/ das der schweis nicht Entblöße
einschlahe zu rücke zu den vornembsten Gliedern/ Vnd nach dem
bald nach dem sich abwischen mit warmen Tüchern/ Schweis
vnd die Leylach oder Tücher bald hinweg thun / vnd schädlich.
frische unterlegen/ als denn ist ein Mensch mit der hülffe
Gottes wol sicher / das er an dieser krankheit nicht
stirbet/ Gott wölle ihn denn sonderlich haben.

Er sol sich aber gleichwol daran scho- Regiment
nen vnd hüten/auffs wenigste x. oder xiiij. tage/die lufft der Kran-
meyden/ mit essen vnd trincken sich halten als ich kürz- ken.
lich lernen werde/ vnd alle tage was nemen von der Erztz-
ney/ wie oben berürt: Oder Scabiosen wasser/ desglei-
chen Sawerampffer wasser/ Cardobenedicten wasser/
auch

auch Baldrian wasser/ mit Borrage nwasser vermenges/
stercken das hertz/ Ein trüncklen trincken vor dem Abend
essen eine stunde oder zwo. Dergleichen stercken auch
das hertze eingemachte Rosen/ Borrage n blumen/ vnd
Ochsenzunge/ Citrinat/ vnd dergleichen/ als Manus
Christi mit Perlen/ etc.

Die fünffte
Cura.

Welchem Menschen aber das Zwi bel-
wasser mit dem Theriack zu wider ist/ der neme alleine
Sawerampffer/ Scabiosen/ Baldrian/ oder Cardobene
dicten wasser/ iij. oder v. löffel vol/ vnd zutreib e darinne
ein quinten gutten Theriack/ mache das warm/ vnd
gieße darein das gläslein ganz vnd gar mit dem Aqua
vitæ/ das ist ein lot/ so wird es in seine Natur verwan
delt (als ihr sehen werdet) trincke das also warm aus/
vnd schwinze darauff wie gelart ist/ denn darff er nicht
das Zwi bel wasser/ noch keine andere Erzney.

Gebrauch
des Ther
iacks mit
dem Aqua
vitæ.

Were aber arm gemein Bawersuolck/ die obangezeigte
gebrandte Wasser (darinne man pfleget den Theriack zu
zutreiben) nicht haben köndten/ die mögen/ so es mit Kelte
ankömpft/ denselbigen in Weine: Desgleichen mit hitze/
in Eßige nemen/ vnd gleichwol das ganze gläslein vol
Aqua vitæ darein thun vnd austrincken/ vnd schwinzen
wie gelehret. Aber mit dem Zwi bel wasser ist ein halb
gläslein gnug / vnd also kan man zwo Personen mit ei
nem gläslein gnugsam versorgen/ das sunst eine Person
allein haben mus.

Aqua vi
ta, dienet
vor den
Schlagß.

Wisset / das die Wasser des Lebens/
Aqua vitæ genant/ lenger den xxx. Jar/ so es wol zuge
macht/ vnuerderblich gehalten wird. Dienet auch iij.
oder v. tropffen genomen mit Laucndel wasser/ vor den
Schlagß/ vnd andere vnsegligh viel Kranckheit/ Welches
lob vnd tugend ich vmb Kürze willen unterwegen lasse.

Welcher das machen wil/ der findets Klerlich beschrie
ben in der Practica Guanerij/ der es nicht verloben kan/
was Krafft vnd macht das hat.

Nu ist

Nu ist Wacholterbeer öl / das durch die Distilirung gemacht wird / vnd abgesündert wird / von der wasserigkeit / durch die Philosophi vnd Medici beschriben / auch schier dieser tugent vnd krafft / vnd wird in allen massen gebraucht / wie das Aqua vitæ / Allein man gibt einem alten ein quinten / vnd zertlicher Complexion ein halbes quinten / den jenigen den auffgefaren ist. Die aber allein Febres Pestilentialia haben / als jtz under gemein ist / gibt man das in den dreyen Conseruis / als Rosen / Borrage / vnd Ochsenzungen / der jtzliches ein halb lot / vnd zutrieben im Mörser / mit ij. loten Borrage wasser / vnd mit ij. loten Rosen wasser / wol warm gemacht / vnd durch gerungen / vnd darein gegossen das Wacholterbeer öl ein quinten / one zuthuung des Theriacs / Die bey xij. Jaren ein halbs / vnd denn warm zugedeckt / iij. oder iiij. stunde darauff geschwitzt / Ist ein sehr edle Ergney.

Wiltu nu weiter vnd fürder seine krafft wissen / so lies die Bücher / die von den Wacholterbereren ihre tugent beschreiben. Auch wird dis öl vergleicht dem natürlichen Balsam / Denn man mit einem tropffen ein ganzen Becher mag tingern / vnd daraus machen ein edelen Wacholterbeer wein / der denn sehr gut ist vor viel Kranckheit / da von zu schreiben lasse ich nach vmb der Kürze willen. Dis findet man bey mir.

Ich wolt es wol schreiben / so kan es keiner nicht machen / man weise jm denn das mit der hand / Desgleichen mein Latwerge / da gescheiden wird aus dem Theriac vnd Mithridat / das subtil von dem groben / Das denn in die Alchamey gehört / wie das gesündert wird.

Welche aber diese oben erzelte Ergney
nicht gebrauchen wollen / von wegen einer grossen vers
samlung / als Klöster vnd Herrn Höfe / die viel gesindes
haben / wil ich leren eine geringe edle Ergney / wie man
die retten sol mit geringen dingen / darmit ich vber Drey
Hundert Personen geholffen habe in vier Sterben / die
macht also.

zur 51 sop
optimum.

Die Sie
bende
Cura.

Nemet Schelwurtz mit sampt dem
kraut/wasche es rein/scharbe es grob/thu es in einen gless
sen Topff gantz vol/ vnd guss darüber so viel Wein oder
Weinessig/ als darcin gehen kan/ Darnach nim einen
andern glessen Topff/ der also sey geschickt/ das er im ers
sten rand des topffes mag gestürzt werden/ also das sein
boden oben stehet/ Darnach mache ein kleister von Eyers
klar zuschlagen/ vnd Mehl / vnd kleibe in wol zu / vnd
las in gegen dem kolschwär an allen örten wol treuge wer
den von fern / denn setze in in ein zirkel schwär / also das
die kolen den Topff bey einer halben ellen nicht berühren/
vnd also in sieden lassen one vnterlas bey vj. stunden.
Wenn nu vj. stunde vergangen sind/ nim in von dem
schwär/las in kalt werden/ Brich in auff/ vñ thu das kraut
mit der wurzel in ein rein tüchlein/ vnd ringe es aus/ je
ein wenig vnd aber ein wenig/ bis das gar ausgerungen
wird / Dis behalt in glessern wol vermacht/das kein ruch
darvon möge gehen/ vnd behalt es zu der not.

Welchen die Kranckheit bestehet / es sey
Pestis mit auffarunge der Apostem / Schwartz blattern
oder Carbunkel / oder die Febres Pestilentialis haben/
On auffarunge der Feins/als da mögen sein Febres in in
nerlichen geistern / oder in humoribus calidis, colericis,
subtilibus, &c. der neme dieses Trancßs iij. oder iij. gu
te löffel vol/vnd lege sich nider/ vnd schwitze iij. oder iij.
stunde/ oder so lange ers erleiden kan/ so ist er mit Gottes
hülffe.

hülffe genesen. Wer es aber noch besser in solcher noth haben wil/der zutreibet in obgemelter decoction von der Schelwurtz/das zuuor bemelte Electuarium nostrum vom Einhorn/eines Guldens oder halben schwer/nach weiche vnd zertligkeit der krancken Personen / vnd gebe es dem Patienten warm ein/ Ist der besten beweresten Ergney eine so man haben mag.

Man sol in zweyerley sieden / mit Wein vnnnd mit Essig / Denn die diese kranckheit mit frost bekommen/gibt man den Trancß mit Wein gesotten / Den es aber mit hitze ankömpt/gibt man den Trancß der mit Weinessig gesotten ist.

Wiltu sicherer sein/sonderlich so dir auffgefahren ist/ so zutreibet guten Theriac darinnē / eines guldens schwer/ oder eines halben / nach dem alter vnd stercke/auch nach der zertligkeit der Complexion. Dis kraut mag wol in der rechten warheit / Celidonia zu Latein geheissen werden / das ist / ein himlische gabe zu Deudsch / den Menschen von Gott vmbsonst gegeben.

Etliche nemen drey theil des Schelkrauts / mit sampt der wurzel/vnd thun ein theil Rauten dazu mit der wurzel/vnd sieden das wie gelert ist/in töpfen. Etliche sieden diese ij. Trencke in grossen zihnen Kannen wol vermacht/wie geleret ist/in einem Kessel mit wasser/vnd mus acht stunde sieden/ij. stunde lenger denn im zirkel fewr / ist gleicher tugent vnd Wirkung.

Item / das Latwerge vom Ey mit dem Saffran gemacht/wird auch dreyerley weise zubereitet / das findet man in viel Regimenten/das ich lasse bleiben vmb kürze willen.

Nu folget eine sehr gute vnd gewisse Ergney / vor die Kriegsknechte / die was peinlicher ist/ denn Leiberzney/ welche martern/ fluchen
E ij vnd

Cura militaris.

vnd schweren / als gemeiniglich sich oft Pestilentz vnter
 in begibt in Kriegsleufften / vnd keine Erzney vberkoms-
 men mögen / Die nemen eine Eysen Zangen / mit welcher
 sie die haut mögen dehnen : Also / fehret jm auff vnter
 dem arm / darvon ein queren hand gegen dem elbogen /
 vnd habe ein klein rhörlein von blech gemacht / wie ein
 klein federkeil / das setze er auff die gedente haut / denn ha-
 be er / oder ein ander / ein glüendt spizig Eysen oder pfris-
 men / die durch das rhörlein gehen mag / das steche er
 durch die haut / vnd ziehe es bald widerumb heraus / vnd
 stecke darein Christwurgel / Eleborus niger genant in La-
 stein / mit guter frischer Butter bestrichen lang gnug / an
 des Eysen stat / vnd las die wurzel also stecken / so wirstu
 wunderlich ding von geschwüre sehen / denn alle Gifft da-
 heraus mus fließen / vnd wie du gethan hast am arm / als
 so magstu das auch applicirn an beinen abewertz / vnd
 also nach schickligkeit der auffarung / wo die haut am
 bequemsten zu dehnen geschickt ist. Aber keiner sol
 schlaffen vnter xij. stunden / denn genesen sie auch alle
 mit Gottes hülffe.

Die Ach-
 te Cura.

Nu wil ich offenbaren zwo sonderliche
 weise / die auch vor alle Pestilentz dienen /
 vnd nicht allein vor die Pestilentz / Sondern auch vor alle
 Menschen / den vorgeben wird mit Gifft / als vielmal sich
 begibt mit grossen mechtigen Fürsten vnd Herrn / Prela-
 ten / etc. wie man den zu hülff komen sol / Auch jungen
 Gesellen / den man pflegt die liebe zugeben. Die eine weise
 geschicht durch das brechen / die wird von allen bewertent
 Doctoren gelobet / Die andere durch den schweis / durch ein
 sehr edel wunderlich Bad / ob die gifft so hefftig were / das
 der hals verschwülle / vnd nichts kündte von Erzney ein-
 nemen / Den kömpt man also zu hülffe durch dis Bad.

Nim ein new gebacken Hausbrod ziel-
 messiger grösse / schneid das auff an der vntern rinden /
 einer

einer hand brei/ geus darein iij. quarter Malmasir/ ver-
menget mit ein lot des Aqua vitæ / vnd geus das in das
warm Brod/ Kanstu das Aqua vitæ nicht haben/ so thu
darzu an stat des Aqua vitæ/ des aller besten gebranten
weins ij. lot/ Kan man auch den Malmasir nicht ha-
ben/ so mag man nemen andern guten starcken wein/ lege
den Brancfen in ein Bette auff den rücken/ vnd lege ihm
ein rein Leinen tuch auff den bauch / als denn das Brod
also warm drauff geleyet / also / das das ausgeschnitten
loch/ gleich auff den Nabel kome/ decke den Brancfen wol
zu/ vnd las in schwitzen iij. oder v. stunde / oder lenger/
das in keine luffte berüre/ den schweis treuge ab mit einem
schwamme/ oder reinen warmen tüchlein/ also lange das
er nimer schwitze/ denn las in in die wirm gehen/ vñ nicht
in die luffte/ den schweis wische allenthalben gar abe/ vñ
vnten anzuheben / Auch soltu im ehe er in das bette stei-
get/ so er was einnehmen kan/ geben des besten Theriacks
eines gülden schwer in Cardobenedicten/ oder Scabiosen/
oder Sawrampffer wasser zutrieben/ warm gemacht vnd
eingetrucken. So man aber rechtschaffen Einhorn
haben mag ein scrupel / das ist ein dritteil eins quinten/
geschabet oder gefeilet / vnd in der wasser eins zutrieben/
treibt dester ehe alle Giffte aus durch den schweis. Dienet
auch also gebraucht vor alle Pestilenz / das ich vor xxx.
Jaren beweret habe an viel ehrlichen personen zu Leipzig
die noch eins teils leben/ welche haben gehabt Carbuncfel
bey dem hertzen/ vnd darzu Apostem vnter den armen.

Das Brod begrabet vnd bewaret das sehr wol/ auff Cautela,
das weder Mensch noch Thier dauon esse/ es müste sonst
sterben/ denn es alle giffte in sich gezogen hat.

Welcher aber der Giffte zeitlich gewar
wird / ist keine besser hülff noch rath / denn das man die
durch den vomitum/ das ist/ durch das brechen vom Men-
schen bringe / vnd durch das Aurum vitæ, das man ihm
E iij gebe

Gebe eines alten pfennig schwer / in einer nassen Oblat/
wol eingewickelt vnd eingeschlungen / das es vnzerteilt in
Nagen möge komen / ist eine Erzney vnd Vomittiff / das
obererit alle andere Vomittiff / dienet auch vor alle Pestis
lentz / so es recht von Vngerischem Golde vnd Mercurio
gemacht wird / das ist Quecksilber.

Aurum vitæ / welches wird also gemacht.

Aurum
vitæ,

Die neun/
de Curs.

Nim Mercurium wie viel du wilt / ix. oder x. lot rein ge
waschen mit Eßige vnd mit Salze / vnd Gold ein lot/
gantz dünne geschlagen oder klein gefeilet / daraus mache
ein Amalgama / das ist ein weis müßlein / die alle Golds
schmide wol können machen / vnd das haben müssen / so
sie vbergülden wollen das Silber. Dis Amalgama was
sche aber mit Eßige vnd Salze / so oft bis keine schwer
ze darvon mehr gehet / denn thu das in ein Kolben Glas/
darinnen die Goldschmide pflegen das Gold vom Silber
zu scheiden / Vnd geus darauff dis nachfolgende zubereit
Aqua fort / so viel das sich der Mercurius / das ist Queck
silber / gantz vnd gar soluiet zu wasser / vnd das Gold ein
breunlich Puluer werde im grunde / denn brich das Glas
abe / mit einem glühenden Eysen ringe / vnd das volutere
wol mit geschlennitem Leim wol gepert mit scherwollen/
vnd setze ein Helm darauff / der sich wol schliesse / den vers
mache wol / vnd also Distilier das Aqua fort darvon.
Zum ersten mit gelindem feur / darnach je lenger je ster
cker / Zum letzten / das der Sand vnten glühend werde / vnd
die spiritus alle ausgetrieben sind / denn so höre auff / vnd
las das Glas kalt werden / so findestu ein roth puluer wie
ein scharlach / im grunde des Glases / wie ein küchlin zusa
men vermenget / das Glas zubrich vnd reibe das küchlein
zu puluer / auff einem reinen stein / kere dich vom Winde /
denn der ruch ist einem Menschen schedlich / darumb reibs
in der lufft vnd nicht in verschlossen gemachen. Dis Pul
uer calcinir also. Nim ein grossen treibschirben / den las
vnter

unter ein Mäffel im probir Ofen glüen / das er tuncfel
 glüe / denn so schütte darauff mit einem Eysen löffel des
 puluers ein wenig / als iij. oder iiij. lot auff einmal / vñ mit
 einer Eysen spattel wol vmbgerüret / so siehestu mancherley
 farben / vñ wird schwarz mit zu / so höre nicht ehe auff/
 es werde denn widerumb roth / wie du es hinein gethan
 hast / Denn nim das heraus mit einer zangen oder Plufft/
 vñ las kalt werden / Denn nim ein andern treibschirben/
 solcher größe wie der erste / der ausgeglüet ist / den setze an
 des ersten stat / vñ schütte aber des Puluers darauff / wie
 geleret ist / vñ las ausglüen wie das erste / stets vmbges
 rürt / bis alle andere farben vergehen vñ widerumb roth
 werden / denn sind alle spiritus das Aqua fort durch diese
 calcination ausgeraucht / das es den Menschen nicht
 schedlich kan sein. Aber viel Alchimisten geben sich aus
 das zu machen / Sie machen es wol mit solcher farbe aus
 Mercurio / allein one zuthuung des Goldes / auch ohn die
 calcination / sie lassen es bleiben bey der ersten arbeit / Das
 rumb seid nicht leichtfertig solchs Puluer von einem ißli
 chen der sich mit treget / abezukeuffen vñ einzunehmen/
 denn sie die calcination nicht wissen / auch das gold darzu
 nicht nemen / welchs das herze sterckē thut / das der Mer
 curius dem kein schaden zufügen möge. Dis Puluers gibt
 man den alten verwachsenen Menschen eines alten pfens
 ninges schwer / einem bey xij. oder xij. Taren eines alten
 hellers schwer / in einer nassen Oblat / wie gelert ist / vñ in
 Keinerley anderer weise / sol es recht seine Wirkung thun/
 die ich denn mancherley versucht habe an viel Menschen/
 ich habe auch zu Leipzig viel jungen schönen Gesellen das
 mit geholffen / den Vergeben was von weibsilden / die in
 die liebe hatten geben / das sie verdorreten / in solchem fallo
 hab ichs selbst drey mal müssen nemen / ehe ich mein Weib
 nam vor xxx. Taren / welches Krafft vñ macht ich hie
 vmb der Kürze willen nachlasse / denn es dienen ist in calis
 bus desperatis, vñ vor alle Gifte / als du wirst finden in
 dem gemein Herbario / in capite de Bolo armenio, am ende.

Warnung
 für bes
 trug.

Das Aqua fort/dadurch die Aurum vitæ wird zubereit/machet also. Nemet ij. pfund Vicril/vnd j. pfund guten Salpeter der vngeselschet ist/ die reibe wol vntereinander/ denn Distillirt darans ein wasser/wie sichs gebürt wenn man Gold von Silber wil scheiden/ das kein Spiritus dahinden bleiben/ Wenn das Distilliret ist von dem Salpeter vnd Vicril/so mus mans noch einmal an ihm selbst one allen zusatz vber Distilliren / Also kleret es sich von den groben Spiritus vnd soluir/das ist/es löset auff den Mercurium/vnd macht ihn zu lauterm wasser/wie oben berürt ist / vnd calcinirt das Gold.

Es ist auch not zu wissen einem jederman/welcher eine Ergney vor die Pestilenz in der not nimpt / vnd wider durch das brechen von sich gibt / das man darumb nicht bald verzagen sol / sondern viel mal eingeben / ob was bey ihm bleiben wolt. Wiltu nu gründlich wissen/ ob hoffnung bey ihm zu warten sey oder nicht/ so thue eines Guldens schwer Krebs augen klein zustossen in Essig/ welchs anhebet zu sieden/ als ob es bey einem Feuer stünde/wenn das sieden nu vergangen ist/denn rüre das Puluer wol vmb/vnd gib dem Krancken das zutrieben / also zu trincken / Bleibt es bey ihm / so ist ihm wol zu helfen/ Gibt ers wider von ihm / das ist ein warhafftig Zeichen/ das das hertze vergiffet ist / vnnnd ihm nicht zu helfen stehet.

Derhalben wil ich trewlich ein jederman gewarnet haben/das er darzu thu / je ehe je besser/ehe denn die Gifte das hertz ein nimpt/vnd vor den Schlaff / der oben erzelten Ergney eine neme nach seinem wolgefallen / welche dienen vor die Reichen vnd vor die Armen/ das denn ein jederman wol erlangen mag nach seinem stande. Ich rathe auch trewlich einem jederman / der die Gifte durch den schweiß von sich bracht hat / es sey durch Puluer/ Latwerge/oder in trencken/das er seinen Leib den andern morgen darnach lasse reinigen / durch das Puluer von

Reubarz

Verstopfung des
leibs vor/
zukomen.

Reubarbaro/oder durch die Pillen von Reubarbaro/oder durch die Pillen Pestilentialiaes/das er auffss wenigste kait vberkomen ij. purgation stüle/ob was von der giffte noch hinderstellig were blieben/das die durch solche purgation stüle/genzlich möchte von jm gebracht werden.

Nu ist von nöten die Vnterweisung/
wie man die Apostem/ Anthrax/ Carbu-
ckel/ vnd schwarze Blotter Curiren/ Vnd wie man die
Giffte tödten sol / so sie durch das Schwikken vnd
Aderlassen nicht genzlich verzeret werden/
das doch gemeiniglich geschicht.

Welche Apostemen sich zuschweren begeben / soll
man darauff legen der nachfolgenden pflaster
eins. Nemet das kraut von der wilden Taupent
schön/mit der weissen blumen / wechset gerne an den dörs-
ren wiesen / ist gleich an blettern der zannen/Dis kraut nes-
met ein hand vol/siedet das mit Lanckwell/oder dem ges-
ringsten trancke/das es weich werde / darnon nemet ein
Züner Ey gros/ stampffet das in einem Mörsen/ vnd le-
get das laulicht darauff / alle tage zwey mal vernewet/
zeucht alle Giffte aus.

Ein Ander. Nemet grüne Rauten / Kübrettich zu
scheibichen geschnitten/ jglichs ein hand vol/auch Senff
ein löffel vol / stoffet jedes sonderlich / darnach alle drey
vntereinander/von diesen binde darauff/als ein halb Zü-
ner Ey gros/ mehr oder weniger / nach der grös des Apo-
stems/last das vj. oder viij. stunde ligen/ denn bindet ein
frisches darauff/dis thut bis es blasen auffzeucht/die las-
set denn aus mit einer grossen Nadel / darein ein wülten
fadem gezogen ist / den last stecken in der blasen/ so fleußt
die Giffte heraus / Man hüte sich aber vor dem ge-
stancke.

Ein Ander. Man mag Rottich schreiben auff Eolen rösten / vnd im Mörtel wol zuschöpfen / das sie werden wie ein mus / vnd also allein darauff legen / Ist aber nicht so gut / dennoch ist vielen darmit geholffen worden / effe vernewert.

Ein Ander Pflaster auch gut / vnd allezeit zubekommen: Nemet Hünner mist / vnd temperirt den mit Eyer Elar / das es ein Pflaster werde / vnnnd durre auffgelegt / zeucht aus die Gifft.

Ein ander Pflaster: Nemet die mittelfte schale vom Holunder geschabet / vnd so viel Häffern Mehl / siedet das mit Sahn oder Milchram / das es werde wie ein mus / dis leget warm auff / machet es balde weich vnd reiff / das man es auffinachen kan.

Ein ander wunderlich Pflaster / sehr wol zubekommen: Nim Walwurtz / oder schwarzwurtz / zu Latein Consolida maior genant / die zureibe zwischen ij. steinen / das es werde wie ein mus / das binde darüber ij. oder iij. mal / zeucht alle Gifft aus in einem tage / Welchs beweren Theodoricus vnnnd Rogerius. Desgleichen thut auch Scabiosa also applicirt.

Ein ander Pflaster / welchs thut das Apostem verzeren / oder die Gifft auszichen / macht also: Nemet Armoniacum / ein harz in der Apotecken also genant iij. lot / weis Lilien öl ij. lot / new wachs j. lot / dis lasset mit einander zugehen auff gelinden Kolfewer / daraus wird ein sehr edel Pflaster / das gebraucht zu dem Apostem.

℞ Cantharid. ablatis alis & capitib. ʒ j. 5. Axung. veteris ʒ j. Contere inuicem bene cum ligno & non alio instrumento, cui adde Ceræ nouæ, Mell. despum. añ. ʒ 5. Camphor. sang. drac. añ. ʒ 1. 5. Lumbric. terr. ʒ vi. Contere & mis. inuicem in mortario ligneo, & fiat ynguentum.

Nach

Nach dem / vnd dieweil weiland mein
lieber Vater seliger vermercket / das manch Mensch vnd
sonderlich durch die vnerstendigen unbewerten Arzt/
verseumet vnd in gefahr gesetzt wird / So hat er leglich
auff günstiges ansuchen eines Aichtbarn Hochweisen
Raths der Churfürstlichen Stadt Leipzig/in allen dreys
en damals gewesen Apotecken zu nechst obgeschriebenes
grawes Pflaster/ vnd nachfolgendes schwarzes Sälblin
dieser description nach zu machen verordnet / damit sich
ein jeder dem auffgefahren ist/vermittelst Göttlicher hülff
retten/vnd selber heilen kan/wie folget.

Nemet von dem grawen Pflaster als viel not ist/vnd
macht darvon ein Pflaster oder Schwedlin / das es das
auffgeschossene Apostema oder Drüsen allenthalben wol
bedecken mag/dareit macht mitten ein loch eines gülden
weit/gantz rund vnd scheiblicht/ vnd leget es mitten auff
das Apostema oder Drüsen. Da sich aber dis grawe Pflas-
ter nicht gerne wolt auff streichen lassen/so macht es vber
einem liechte warm/ damit es auff dem leinē tuch hafter.
Als denn nemet auch des schwarzen Sälbleins vnd strei-
chet es mit einem hölzlin wie ein spatel zugericht/ oder
wie jr können/doch mit keinem Eysen nicht/eines gülden
breit/ vnd zweyer gülden dicke / auff ein ander tüchlein/
vnd leget das gleich auff das loch des grawen Pflasters/
das es die blossē hant berüre vnd nicht abfalle/las es also
vi. oder viij. stunde darauffligen / bis das es eine blasen
auffzeucht / denn nemet das schwarze Pflasterlein abe/
vnd stechet die blasen auff mit einem spitzigen hölzlin/vñ
ja nicht mit keiner Nadel oder Eysen / so fleust alle giff
heraus/die sonst zum hertzen gehet vnd einen Branken
tödtet. Vnd zu mehrer sicherheit / so bindet ihme von
Kettich geschnittene scheiben an die solen oder Füße mit
ten in die dünne/vnd sonderlich an der seyten/ da auffge-
fahren ist/oder stoffet den Kettich/vnd bindet den auch al-
so an die füße / wenn er trucken wird / nemet ihn ab vnd

bindet frischen auff/ das leß keine giftige ſich zum Herzen gehen. Wenn nu das Apoftema ausfellt vnd löcher gewint/ ſo heylet das mit Braunem Zugk oder vngesalzener Butter: Oder macht ein Sälblin von vngesalzener Butter/ Honigſeim/ vnd ein wenig Weizen mehl/ darvon machet ſchwedlin oder pfläſterlin/ vnd leget die auff den ſchaden. Der Krancke ſol in xj. oder xij. ſtunden nicht ſchlaffen/vnd in iij. tagen kein Wein trincken/auch in ix. tagen nicht an die Luſte gehen oder lenger/ Denn gewirt ihm mit Gottes hülffe nichts.

Ein edel Defenſiff/ das man vmbher ſtreicht/ vor die Barbyrer/ Die nehmen Bolum armenium klein gepüluert/ vnd machen ihn wie eine dünne Salben an mit Roſen öl/ das ſtreicht vmbher/ leß nicht mehr hitze zuſchlahen/ vnd thut bewaren den Menſchen/ das ſich die Gift nicht theilen kan/ Habt ihr nicht Roſen öl/ ſo nemet an deſſelbigen ſtat/ rechtſchaffen Leinöl.

Nu folgen Zwen Pflaſter auszuziehen die gift/ dergleichen ich noch nie erfunden habe: Nemet ein geſpiſte Kröte/ welcher von der Luſte all ihr gift iſt ausgezogen worden/ lege die in ein Eßig vber Nacht/ oder auffſ wenigſte vj. ſtunde lang/ das ſie erzlicher maſſen quelle/ Denn binde die auff die Apoftem oder Drüſe/ zeucht alle Gift aus vnd an ſich/ das dem Menſchen nicht gewirt mit Gottes hülffe/ vnd iſt war/ haſſtig alſo verſucht worden an viel Menſchen. Man macht auch ein Puluer dauon/ wenn man die geſpiſte Kröte zu puluer brennet/ vnd ſtrawet das in Alte böſe Schäden die niemand ſo heylen kan/ heylet die von grund auff. Die geſpiſte Kröte in ein Seyden tüchlein gebunden/ oder das Puluer/ vnd vnter die Armen geleget vnter die achſeln/ das es wol erwarme/ verſtellet alles Blutten/ vnd auch der Frawen blumen welche die vberflüßig haben.

Das

Puluis
für alte
böſe
ſchäden.

Das ander Pflaster hat nicht weniger
Krafft/ist schwerlicher zubekomen/ welchs ist vor Jung-
frawen vnd Frawen. Die Jungfrawen sollen hohent
fleis vorwenden/ wenn sie zum ersten mal ihre Blumen
vberkomen/ das sie die versamen in rein gewaschen tuch-
lein/ vnd dieselbigen wol lassen trucken an der Luft/
vnd nicht auswasschen/ Darnach heimlich verwaren
vor ein grossen schatz/ Vnd in der zeit der Pestilenz/ so
jemandes auffgefahren ist einicherley Apodem/ Carbu-
ckel/ oder schwarze Blotter/ so nemet nach der grösse ein
wenig hinüber derselbigen geferbeten Tüchlein/ die netzet
in Eysige/ vnd leget die darüber ein mal oder zehen/ als
offt es treuge wird/ wider in dem Eysige generzet/ nicht
gantz kalt auch nicht zu warm/ das der Eysig die farbe
nicht ausziehe.

Wiltu nu propiren vnd wissen/ob alle giftt sey aus-
gezogen durch diese Pflaster / so nim junge Tauben oder
Hüner/vnd berauffe die vmb den steus / vnd halt die also
lebendig darauff/Ist das die lebendig bleiben/ so ist sich-
erlich alle Giftt ausgezogen/sterben sie / so ist nach mehr
Giftt verhanden/denn binde der Pflaster widerumb eins
darauff/bis alle Giftt ausgezogen ist/ Oder setze die lebens-
dige gerauffte Taube so viel darauff/ bis eine lebendig
bleibt / denn bistu sicher / das alle Giftt ausgezogen ist.
Eliche aber binden lebendige Frösch darauff/ das ich
nicht lobe. Denn vmb der kelte willen/die Giftt zurücke
möcht schlagen/vnd also der Patient in grosse fehrlichkeit
möchte komen.

Aluff die schwarze böse gifttige Blot-
tern (ire Giftt auszuziehen) macht diese Erzney. Neme
ein blat von Einbeer Kraut / zu Latein Vva lupina
genant. Einbeer hat vier bletter creuzweis / vnd mit-
ten inne ein schwarze beer/ Dieser Bletter nemet eins / vnd
leget oder bindet das frisch darauff / iij. oder v. mal an

tage vernewet/Rönd jr die nicht grün haben/leget die in
frisch wasser/so werden sie wider frisch/die leget auff wie
gelert ist/ziehen alle hize vnd giffte aus.

Ein anders allezeit zubekomen: Nim das weiße
von zwey Eyern/vnd thu das in ein schüssel/vnd zutreibe
das mit einem stücklein Allaun/also lange/das es werde
als ein weich geronnenen Bese/von diesem nim als ein hal-
be welsche Lufs gros / vnd binde das darauff/zeucht die
hize vnd Giffte der schwarzen blottern an sich / vnd offte
vernewet wenn es durre wil werden / Ist sehr gut.

Ein anders zu den schwarzen Blottern: Nim
Terbentin mit so viel Honigsein vermenghet / vnnnd ein
Sälblein daraus gemacht/vnd auff die bösen schwarzen
Blottern geleget/benimpt das weh / vnd weicht die bald
vnd heilet sie / Desgleichen heilet dis Sälblein die schwe-
rende Apostheim.

Das sich die Giffte nicht weiter kan
flechten vnd teilen von Apostheimen oder schwarzen Blot-
tern / so nim ein rechtschaffenen Saffir / vnd mache ein
zirckel umbher / den nerge in Wacholterbeer öl / oder in
Meyenwurm öl / oder wo man die zweyerley öl nicht ha-
ben kan/in Leinöl/so mus die Giffte da ausschweren/ vnd
kan sich nicht weiter ausbreiten.

Dis Meyenwurm öl macht also: Ne-
met der Meywürme die man findet im Meyen / die sind
größer denn die Bese/schwarzgilblicht/die lasset sammeln
in einem gefess/da thut gras ein/vnd greiffte die nicht mit
blossen henden an/sondern mit ij. hölzlen/vnd bindet ein
Leynen tüchlein darüber / das sie nicht heraus mögen
kriechen / die thut also lebendig in Baumöl / das sie da-
rinne sterben/xx. oder xxx. darnach jr die bekomen möget/
vnd last die darinne ligen / vnd gieffet ein wenig darnon
wenn jr das gebrauchen wolt/zu schwarzen bösen giffti-
gen Blottern/die damit bestrichen/ist der besten Erzney
eine.

Meyen-
wurm öl
zu ma-
chen.

eine. Auch vor die bißse der tollen Hunde/ damit bestrich Vor der
en/ist den Menschen vor aller fehrigkeit bewaren. Und lobenden
also habt jr gnugsam von der Cur der Apostem/Carbun- Sunde
ckel vnd schwarzen Blottern/etc. bißse.

Dieser Kranckheit zu entfliehen / finde wie der
ich vj. vornemliche vrsachen vnd stücke/die man meyden Kranck-
sol/des besten ein Mensch kan vnd mag/Seinckende lufft heit zu
vnd gemach/vbrigen hunger vnd settigung/vbrige mühe entfliehen/
des Cörpers/vnd vbrige ruhe/vbriges wachen vnd schlaf- vnd was
fen/sonderlich am tage bald nach dem essen/sol man vor- zuuermei-
nemlich den schlaff meiden / Auch so viel möglich ist / des den ist.
Thelichen standes halben darinne mässig halten/Gemeis-
ne Bad fliehen / vnd nicht lang noch heiss baden / Ihr
besorget euch denn/das ihr was gifftiges vberkomen het/
Denn so nemet in der nacht zuuor eins Gilden schwer Wie der
Theriack's/ in einem trüncklein warmes weins zutrieben/ Theriack
warm gemacht / vnd nach Mitternacht vmb eins aus recht zu
getruncken / vnd nach Mittage vmb seigers ij. oder iij. gebrau-
gebad/vnd treuge darauff geschwitzet / mit fünff Rettich chen.
scheiben/vnter jzlichem arm oder achsseln eine gelegt/vnd
die andern ij. in die Heidrüsen/vnd die fünffte binde auff
den Nabel/ziehen von auswendig an sich alle Giffte/vnd
von inwendig treibet der Theriack / Diese gebrauchung
des Theriack's mit dem wein/nimpt man zu Winter zeit/
Aber Sommer zeit / so gebraucht man den / wie gelert ist
in Sawerampffer/ Scabiosen/ Cardobenedicten wasser/
oder in Weinessig mit Rosen wasser vermengeset / vnd
schwizet darauff / wie gelert ist.

Item/ ihe solt Rettich scheiben ein we-
nig rösten oder wärmen auff einem Ofen / denn so man
die Kalt auffleget / verziehen sie den schweis / vnd also
mag thun ein jzlicher dem auffgefahren ist / vnd hat der
Erzney eine genomen / die in der not ist dienen vor die
Pestilenz/vnd nicht gern im bette wil schwitzen/mag mit
den

Dem Kettich also im Bade treunge schwitzen iij. oder iij. stunde / oder so lange es ein jederman erleiden mag / den schweis rein abwischen lassen mit warmen tüchern / vnd sich warm halten nach dem Bade / vnd enthalten vor dem schlaffe / wie in der not gelet ist.

Es irren alle Menschen die den Theriack nemen / vnd bald darauff ins Bad gehen / vnd auch die vor gessen vnd getruncken haben / vnd vermischen damit den Theriack / die thun ihn mehr schaden denn fromen / Denn die krafft vnd Wirkung des Theriacks wird allererst in xij. stunden in die Ader gezogen / darumb solt ihr den nemen nach Mitternacht umb j. Vnd Baden nach dem Mittags essen umb seigers ij. oder iij. Darumb hab ich dis hie wollen einbringen / denn das Bad vnd der Schweis werden mit zu begrieffen in den vj. vnnatürlichē dingen / das ist / vnter den sex rebus non naturalibus.

Vber die benannten ding / ist am aller nützen zu meissen / alle schwermütigkeit / trawrigkeit / erschrecken / furcht / sorge / vnd alle Melancoley / Insonderheit diese krankheit nicht einzubilden / vnd drauff nicht dencken / Denn die gemeinlich darein fallen / die diese stücke / wie oben berürt ist / nicht meiden wollen. Darumb seid zielmessig / frölich in Gott dem Herrn / vnd mit gutten Freunden in der liebe vnd furcht Gottes / Vnd gebt selbst nicht vrsach dieser krankheit / Als denn mit Göttlicher hülff vnd gnade / werdet jr nicht leichtlich darein fallen.

Item / Alle tage auffs wenigste / oder ja vmb den ij. tag / sol ein gericht mit Essig sawer gemacht sein / denn der Essig kület vnd entlediget die feuchtnis in den gliedern / das sie nicht faulet / vnd öffnet die verstopffunge.

Oder dieser dreyerley Salsen eine zum Gebratens gessen / die macht also. Nemet Sawerampffer / den reibet mit Essig / dienet jederman im Sommer / Oder Salben bletter rein gewaschen / grüne Rauten / Petersilien / vnd Welsche Rüffe mit Essig gerieben. Im Winter

nemet

Salsen
zum Ge-
bratens
sehr nüt-
zlich.

nemet Ingwer/ Muscaten blumen/ vnd Zimettrinden/ die macht zu Puluer/ vnd der nemet ein wenig/ vnd gießet Essig darauff/ wird sehr eine gute Salsen. Vnd also köndt ihr abwechseln nach ewrem wolgefallen/ das ihr nicht stets die Speise dörrst mit Essige sawer machen.

Die vornemesten Stücke/ was man von Essen vnd Trincken meyden sol/ auffs kürkest begrieffen.

Schweinfleisch ist in dieser zeit vngesund/ nach dem die Schweine mit den Menschen Cörpern sehr vberlein komen/ vnd gleich so wol an der Pestilenz sterben/ als die Menschen.

Rohe Obs/ vnd rohe Milchspeis/ vnd alle Fische die nicht schuppen haben vnd moderenzen/ werden verboten. Weis Kraut ist in der zeit gantz vngesund/ denn es breite Bletter hat/ darein die giftige Luft sich anhenget vnd einzeucht.

Alle Wasser vogel/ als Gense/ Enten/ Schwan/ etc. vnd Wachteln/ die gemeiniglich verboten sind.

Harte Eyer/ vnd was gebacken ist mit Eiern/ als Eyeruchen/ vnd alle Speise die stopffet/ Denn in der zeit sol man haben des Leibes weichungen.

Vom Getrencke.

Starcke geschwefelte Wein/ oder Malmasier/ sein vngesund in der zeit/ Denn sie hitzen das Geblüte/ vnd schicken das zu einer anzündung der Pestilenz. Diweil die Pestis nichts anders ist/ denn eine vnnatürliche hitze/ die vom Herzen durch die Adern gehet.

Von Rauch zu machen.

Nim Wacholter holz vnd beer/ Thinnian/ Eychenlaub/ dürre Rauten/ vnd mache alle tage früe ein rauch in ein scherben/ vnd trags durch die Gemach hin vnd her/ vnd das thu sonderlich zu zwey oder drey malen/ wenn
G trübe

trübe nebelichte vnd feuchte Luft vorhanden ist/ oder Regenwetter. Auch magstu Reuchern mit Lorberschalen vnd Wermut in stuben/ auch Wacholterbeer in die Kachel legen/ auch im Ofen gemacht ein rauch gemacht mit Bircken rinden/ werden sehr gelobt/ desgleichen von Lychen laube. Die Reichen mögen reuchern in stuben mit Trociscis aus der Apoteccken/ oder lassen ihn machen Orilet/ das sind Reuchterglen/ oder diese Trociscos/ die sehr wol riechen/ vnd kressfrigen den Menschen das hertz vnd gehirn/ vñ alle gliedmassen/ die werden also gemacht in der Apoteccken: Ich lasse es aber vnuerdeuscht/ denn man sie nicht wol machen kan/ allein die Apoteccker.

Trocisci.

Rz Bensoi. ꝑ. asæ dulc. ʒ ij. cinamom. ʒ j. musci gr. x. carbones tiliæ. ʒ ij. dragaganti. ʒ ij. aquæ ros. quart. j. dissoluatur dragagantum cū aqua ros. post inspascuntur & fiant Trocisci lege artis.

Diese Trociscos also gemacht/leget man j. oder ij. in die röre oder Kachel/ machen einen gar lieblichen ruch in der ganzen Stuben/ der ich nicht edler noch besser erfunden habe im reuchern/ vnd die Glieder zu kressfrigen vnd stercken. Wer es thun kan/der mache von dürrem Wacholter holz/ vnd mit dürrem Lychenholz ein Flambfwer in das Haus oder Camin/ wird gelobt vber alle Räuche/ oder von dieser Hölzger eins/ welches Flambfwer thut die vorgifftige Luft gewaltig verzeren: Vnd durch diese weis allein hat Hipocrates die von Athen von der ergfsten giftigesten/ vnd schnellen tode der Pestilenz errettet/ one alle eingebung einigerley Ergney. Derhalben ich trewlich rathe/ das man sich versorge mit Flambfwer/ welche mit gemeinem Volcke vnd Vnderthanen zu thun haben/ vnd in ihrem Ampte müssen bleiben/ als Ampeleute/ Bürgermeister/ Richter/ &c.

Was ein jeder man bey sich tragen sol/
daran er riechen sol/ so er ausgehet.

Das ich in erfahrung bey mir trage/ vnd daran pflege
zu riechen / das ist Baldrian wurzel/ oder Lübestückel
wurzel / der mag man auch ein stücklein in Mund neh-
men/ oder ein stücklein Osterlucien wurzel/ ein stücklein
Zitwer/ oder Diptan gekawet vnd im Munde gehalten.
Die Reichen nehmen ein stücklein Einhorn in mund/
lest keine gifft eingehen durch den mund des Menschen.
Die Naselöcher schmieren sie mit ein wenig Theriack/ der
in Etsige vnd Rosenwasser zutrieben ist/ lest das Gehirn
nicht vergiffet werden. Auch Bybergel im winter dar-
an gerochen/ wird gelobet. Mille folium die Blumen/
zu Deudsch Schaffgarbe blumen genant / daran gero-
chen/ sind sehr gut. Es wird auch sehr gelobet Nigella
Romana, das ist der schwarze wolriechend Römcl/ den
vber Nachts in Etsige gebeist/ den last wider trucken
werden/ vnd macht dauon ein Püschlein in ein Seydent-
tuchlein/ vnd riechet daran/ ist sehr edel vnd gut / vnd
dienet mit zu vor den Schwindel/ vnd allen denen die da
fürchten S. Valtens krankheit: Dis Püschlein wehret
bey x. Jaren/ thut stercken das Gehirn vnd gedechtnis
des Menschen.

Vor die
Fallende
sucht.

Vber dis ist auch gut ein Püschlein gemacht von Rau-
ten samten / Schaffgarbe blumen / Lübestückel wurzel/
vnd Baldrian wurzel/ jgliches ein wenig genomen/ vnd
in eine löchrichte Büchsen gethan / bey sich getragen/
vnd daran gerochen.

Von Wurzeln an blosser haut zu tragen/ werden ges-
lobet/ Wegebreit wurzel / die hornichte Klette wurzel/
zu Latein Radix lappatij cornuti genant/ vnd Hinteluff
wurzel/ zu Latein Solsequium genant.

Von Edlen steinen an blosser haut zu tragen/ werden
gelobet die Saphir/ Hiacineten/ vnd Smaragd.

Vor alle Medicis die da müssen die Kran-
cken besuchen/ das die nicht von jn inficirt
werden.

Sollen nemen dieser pillen eins in mund/ vnd wenn die zugangs
gen ist vnd verserret / nemen sie ein anders / vnd tragen die stets bey
sich/ die manicht man also / Ich lasse es vnuerdenkscht.

Rx Aliptæ muscatæ. boli ar. ana. 3 i. 5. masticeis 3 i. &
cum mustilagine dragraganti facta cum aqua buglossæ, &
parum aceti, fiant pillulæ xij. pro 3 i.

Ein anders noch gemeiner/ vnd allezeit zubekomen/
das sehr gut ist daran zu riechen. Nemet grüne Rauten ein hand-
voll/ stoß die in einem Mörser/ gießet daran guten Weinessig/ zu-
treibet die Rauten wol damit / darnach ringet das durch ein tüch-
lein/ so wird der Esig ganz grün / den behalt vnd nezet darein ein
schwemlein / dis thut in ein gelöcherts höchlein / das traget bey
euch / vnd riechet daran / vnd vernewet das alle tage des morgens.
Ist ein edel Ergney im Sommer vnd im Winter. Diese alle dienen
vor die Armen / vnd vor die / die nicht Tisen apffel riechen können/
Die Reichen aber mögen lassen machen köpliche Apffel von Am-
bragrisea vnd Tisen/ sehet bey jn. Vnd mag ein jedes/ welchs ihm
vnter diesen allen zu nützen oder tragen zum besten gefellet / zu läb-
licher Ergney gebrachen. Die aber die ich probirt hab / vnd im
wercke am hülfflichsten befunden / mit sampt allen meinen secreten/
ausgeschloffen das rechte Aurum porabile, welchs ich noch nie ha-
be können practiciren/ von wegen der Patienten / welches dienet vor
alle Giff vnd alle Franckheit. Die ich aber practicirt habe / die
habe ich allen Christglaubigen Menschen zu trost nicht verbergen
wollen / auff das sie ihr leben möchten fristen/ Gott dem HERRT
danken, ihre Sünde büßen/ vnd Gott ewiglich loben/ Amen.

Bitte derhalben jedermenniglich vmb Gottes willen / das sie
dis Kurtz Regiment/ das ich mit grosser seheligkeit vnd langer erfa-
rung / mit mühe vnd arbeit zusammen gebracht hab/ vnd in Druck
lassen ausgehen / in solcher gutter meinung von mir annehmen / als
ich es herzlich vnd trewlich gemeinet habe / allen Christglaubigen
Menschen zu trost.

Wenn in einem Hause jemand an der Pes-
silenz franck liget/ wie sich die so der Kranken warten/
halten sollen/ Auch so die gestorben/ oder sonst das Haus ver-
giffet ist / was man thun/ vnd wie die Giff widerumb
daraus vnd weg zubringen ist.

Mehr

Mehr ist not zu wissen / allen denen die der Krancken warten/
das sie lawlicht wasser in einem Becken oder Schirben bey den
Krancken setzen sollen/wenn er Seelzüget/Als denn feret die Gifft in
das lawlichte wasser/vnd schadet färdet niemand. Dis wasser gieß
set in ein Secret/das es bewaret werde/vnd niemand schaden möge.

Die der Krancken warten/ mögen Osterlucy wurzel im munde
tragen/lest keine Gifft in Leib komen. Item/ das sich der Krancke
des schluffs möge erwehren / so schmier im offrt vnd dick die Nase
löcher mit Rosen essig oder anderm Essig / vnd las ihn auch das
ran riechen.

Lege Ranten sie sey dörre oder grün / tag vnd nacht in ein
Weinessig/ ringe sie als dean oder reibe sie rein aus / vnd gaus dar
nach den Essig auff ein heisgemachten ziegelstein / dauon wird ein
dampff / der lest keine Gifft in ein gemach / auch nicht in spalten
oder klunffen der wende.

Ein anders vor die gifftige Luft auszutreiben.

Ist noch gifftige luft von einem verstorbenen Menschen in ein
gemach / so setze erliche vessle mit warmen wasser in das gemach/
Stuben vnd Kaminer / darinne der Krancke ligt oder gestorben ist/
so leget sich die Gifft auffs wasser / wie ein Nebel oder schleim/als
denn lasse das wasser mehelich austragen / vnd an heimliche örter
gießen.

Ein Anders.

Setze erliche vesslein mit Wasser in ein gemach oder Stuben/
vnd thu darein ein hand vol oder zwei Kupfferwasser/ nach der
grösse des vasses/vnd wirff ein heisgemachten ziegelstein drein/ oder
ein gländt Eysen / oder Stahl / das das wasser sich erwelle oder
siednicht werde / so zeucht sich die Gifft gewaltig drein / das thu
etlich mal.

Man sol auch im Hause Tische/ bencke/ tücher/ Fleider/ reinigen
vnd waschen/auschütteln/so gehen die giffrige dänste daraus.

Wenn man auch ein gros feuer macht von Eychenholze/ oder
Wacholder/ so reiniget sich auch die Luft/wird subtiler vnd gesun
der / danon denn der Mensch auch gesunder wird / vnd fasset bes
sern muth.

Da magst auch wolriechende Kreuter in die gemach oder Kamin
mer legen / Als da sein Salben Bletter / Eissop / Lavendel / Spicas
nard / vnd andere / sie sein grün oder dörre.

Allhie wird auch gelobet der vngesalte Kalck/den man allein
in ein gemach legen sol / zu dempffung der gifftigen Luft.

Man sol auch offrt reuchern mit dörrem Eychen laub/Wermut/
oder Wacholderbeer / dörrem Wacholder / oder Weirach/vnd derg
gleichen / so reiniget sich auch die Luft.

Gott sey allein die Ehr in ewigkeit / Amen.

IN LIBRVM
CLARISS. VIRI,
DOCTRINA AC VIRTUTE PRAE-
STANTIS DOMINI CASPARIS KEGELERI
Senioris, Philosophiæ ac Medicinæ Do-
ctoris, laudatissimæq; Scholæ Lipsicæ
olim Professoris: Carmen
scriptum per

M. MARCVM FRYTSCHIVM
LAVBANVM.



Mpietatis onus Mundum peruasit & Orbem,
Tristia quinetiam multa Tyrannis agit.
Libera peccandi & faciendi cuiq; potestas
Sumitur, & non est qui bene viuat homo.
Agmina bellorum quapropter mille peragrant
Et vastant Mundum vulnere, cæde, plagis,
Hinc fames, pestis, diræ quoq; Mortis imago,
Corripiunt homines obijciuntq; rogis,
Hæc mala non casu fiunt temereq; vagantur,
Sed sunt irati signa tremenda DEL.
Vt pestis, fames, & tristia bella quiescant,
Disce pijs precibus sollicitare DEVM.
Sis pietatis amans, immuta deniq; mores,
Et vitæ prauæ gaudia falsa tuæ.
Tunc pax grata bonis toto consurget in orbe,
Et tranquilla ferent tempora Christigenæ.
Tuncq; metus Mortis quæ multa cadauera sternit,
Ipsa perituris parcat vbiq; viris.
Bella necesse tamen cùm sint peragenda Monarchis,
Illa gerant Reges magnificiq; Duces,

Vt tamen

Ut tamen & pesti medicamina iusta ferantur,
 Ac nutu serues pectora sana DEI.
 Est donum Medicina DEI, munusq; Tonantis:
 Prudentes Medicos consuluisse velis.
 Hi tibi monstrabunt medicamina iusta radicum,
 Sicut parturiens spargit abunde solum:
 Quinetiam herbarum vires lapidumq; bonorum
 Virtutes, quales Diuus Apollo colit.
 Illorum auxilio fultus seruaberis inquam,
 Effugiesq; atræ noxia damna luis.
 Inuenias autem præstantes vndiq; toto
 Orbe bonos Medicos eximiosq; viros.
 Qui contra diram præsentia pharmaca Pestem
 Ex animi voto suppeditare queunt.
 Qualia CASPARVS KEGLER iam morte solutus
 Post pia fata tibi suggerit atq; docet.
 Hæc iterum sua cùm medicamina læta salutis
 Edantur gratis, digna fauore putes,
 Hæc experta fati constat Lipsensibus, & quos
 Insuper indigenas Misnia terra fouet.
 LIPSIÀ quem diues meritò plorauit ademptum,
 Cùm nuper multis ciuibus orba foret.
 Hic vbi grex omnis Medicorum peste timerent,
 Et sibi censerent nil prius esse fuga:
 Perstitit is, plures & grandi labe leuauit,
 Vnde prior multis est sua parva salus.
 Seruatos rite ob ciues viridante corolla,
 Dignus sydereis Aethereisq; plagis.

F I N I S.

Gedruckt zu Breslaw / durch
 Crispinum Scharffenberg.

Im Jahre.

1 5 6 8.



Med. Hist.

WZ

240

K26 r

1568

